

পুরাণসংগ্ৰহ ।

মহর্ষি কৃষ্ণ দ্বৈপায়ন বেদব্যাস প্রণীত

মহাভারত ।

মৌলিক পৰ্ক ।

দ্বাদশ খণ্ড ।

শ্রীযুক্ত কালীপ্রসন্ন সিংহ মহোদয় কর্তৃক
মূল সংস্কৃত হইতে বাঙ্গালা ভাষায় অনূবাদিত ।

“ যদি বিনা ব্যাঘাতে জীবনযাত্রা নির্ভর্য্য হইত তাহা হইলে
মহাভারত গৃহের আশ্রয় গ্রহণ করুন । ”

সারস্বত্যাশ্রম ।

পুরাণ সংগ্ৰহ যজ্ঞ ।

শকাব্দ ১৭৮৫ ।

মহাতারতীয় সৌপ্তিক পর্কের সূচিপত্র ।

প্রকরণ	পৃষ্ঠা	স্তম্ভ	পংক্তি
অশ্বখামার মন্ত্রণা	১	১	১
অশ্বখামা ও কৃপাচার্য্য সংবাদ	৩	২	১০
অশ্বখামার যুদ্ধার্থ গমন	৭	১	২৮
অশ্বখামার চিন্তা	৮	২	২২
অশ্বখামার শিবাকর্না	১০	১	২৭
রাজি যুদ্ধ ও পাঞ্চালাদি বিনাশ	১২	২	১৫
দুর্যোধনের প্রাণত্যাগ	১৮	২	১০
যুধিষ্ঠিরের শিবির দর্শন	২১	১	২
অশ্বখামার বিনাশার্থ ভীমসেনের গমন	২২	১	৩০
যুধিষ্ঠির কৃষ্ণ সংবাদ	২৩	২	১৫
অশ্বখামার বুদ্ধশিরাস্ত্র পরিত্যাগ	২৫	১	১৫
অর্জুনের অস্ত্র পরিত্যাগ	২৫	২	৩১
উত্তরার গর্ভে বুদ্ধশিরাস্ত্রের প্রবেশ	২৬	১	২২
দ্রৌপদী সান্ত্বনা	২৭	২	২৩
কৃষ্ণ যুধিষ্ঠির সংবাদ	২৯	১	৩৩
যুধিষ্ঠিরাজুর্ন সংবাদ	৩০	২	১১

সৌপ্তিক পর্কের সূচিপত্র সম্মূর্ণ ।

মহাভারত ।

সৌপ্তিক পর্ব ।

প্রথম অধ্যায় ।

নারায়ণ, নরোত্তম নর ও দেবী স্বর-
তীরে নমস্কার করিয়া জয় উচ্চারণ ক-
রিবে ।

সঞ্জয় কহিলেন, মহারাজ ! এই রূপে
মহাবীর অশ্বখামা, ক্রতবর্মা ও রূপাচার্য্য
সায়ংকালে শোকসন্তপ্ত চিত্তে রণস্থল হই-
তে দক্ষিণাভিমুখে ধাবমান হইয়া শিবিরের
অনতি দূরে গমন ও বাহন সকল পরি-
ত্যাগ পূর্বক শঙ্কিত মনে প্রচ্ছন্ন ভাবে অব-
স্থান করত ঘন ঘন দীর্ঘ নিশ্বাস পরিত্যাগ
ও পাণ্ডবগণের বলবীর্য্যের বিষয় চিন্তা
করিতে লাগিলেন এবং অবিলম্বেই জিগীষা-
পরবশ পাণ্ডবদিগের ঘোরতর সিংহনাদ
শ্রবণে অনুসরণ ভয়ে নিতান্ত ভীত হইয়া
পুনরায় পূর্বাভিমুখে ধাবমান হইলেন ।
হে মহারাজ ! ঐ সমস্ত মহারথগণ রাজা
দুর্য্যোধনের দুর্দশা দর্শনে একান্ত সন্তপ্ত
ও ক্রোধাবিস্ট হইরাছিলেন ; এক্ষণে কিয়-
দূর গমন করিয়া সাতিশয় পিপাসার্ত্ত
হইয়া মুহূর্ত্ত কাল বিশ্রাম করিতে লাগি-
লেন ।

ধৃতরাষ্ট্র কহিলেন, সঞ্জয় ! ভীম অধুত
নাগ তুল্য বলশালী মহাবীর দুর্য্যোধনকে

বিনষ্ট করিয়া অতি আশ্চর্য্য কার্য্যের অনু-
ষ্ঠান করিয়াছে । হায় ! আমার আত্মজ
বজ্রের ন্যায় দৃঢ় ও সকলের অবধ্য ছিল, কিন্তু
পাণ্ডবগণ তাহারে নিপাতিত করিল । এ-
ক্ষণে স্পষ্টই বোধ হইতেছে, মনুষ্য কোন
ক্রমেই অদৃষ্ট অতিক্রম করিতে সমর্থ হয়
না । হা ! আমার হৃদয় পাষণ্ডের ন্যায়
নিতান্ত কঠিন ; শত পুত্রের নিধনবার্ত্তা
শ্রবণেও উহা সহস্রধা বিদীর্ণ হইল না । আ-
মার মহিষী গান্ধারী স্তবিতা এবং আমিও
নিতান্ত রুদ্ধ হইয়াছি, এক্ষণে জানি না,
আমাদিগের ভাগ্যে কি রূপ দুর্দশা ঘটবে ।
আমি কিছুতেই পাণ্ডবদিগের রাজ্যে অব-
স্থান করিতে পারিব না । আমি স্বয়ং
রাজা ও রাজার পিতা ; আমি সমুদায়
পৃথিবী ভোগ ও ভূপতিগণকে শাসন করি-
য়াছি ; এক্ষণে কি রূপে আমার শত পুত্র-
ঘাতী ভীমের আজ্ঞানুবর্ত্তী হইয়া দাসের
ন্যায় বাস করিব । মহামতি বিদূর আমার
পুত্র দুর্য্যোধনকে বিবিধ হিতোপদেশ প্রদান
করিয়াছিল, কিন্তু সে তদ্বিমুখে কর্ণপাতও
করে নাই । এক্ষণে সেই মহাত্মার বাক্য
উল্লেখের ফল পরিণত হইল । এক্ষণে আমি
কোন ক্রমেই ভীমের কঠোর বাক্য শ্রবণে
সমর্থ হইব না । হে সঞ্জয় ! এক্ষণে দুরা-

আ ভীম অধর্মযুদ্ধে দুর্গোধনকে বিনাশ করিলে অশ্বখামা, কৃতবর্মা ও রূপাচার্য্য কি রূপ কার্য্যের অনুষ্ঠান করিলেন, তাহা কীর্ত্তন কর ।

সঞ্জয় কহিলেন, মহারাজ ! অনন্তর দ্রোণতনয়প্রমুখ বীরত্রয় অনতিদূরে গমন করিয়া এক ক্ষমরাজিবিরাজিত লতাজাল-সমাচ্ছন্ন ভীষণ অরণ্য নিরীক্ষণ করিলেন । তখন তাঁহারা মুহূর্ত্তকাল বিশ্রাম পূর্ব্বক অশ্বগণকে জল পানি করাইয়া সেই বর্জ্জবিধ মৃগ, পক্ষী ও হিংস্র জন্তু সমাকীর্ণ, কল-পুষ্পোপশোভিত, নীলোৎপল সমলঙ্কৃত সলিল সম্পন্ন অরণ্যমধ্যে প্রবেশ করিয়া ইতস্তত দৃষ্টিপাত করিতে লাগিলেন । কিয়ৎক্ষণ পরে এক সহস্র শাখাসঙ্কুল বটবৃক্ষ তাঁহাদের নেত্রপথে নিপতিত হইল । বীরত্রয় তদ্রশ্যে সেই বৃক্ষের সমীপে সমু-পস্থিত ও রথ হইতে অবতীর্ণ হইয়া অশ্বগণের বন্ধন উন্মোচন পূর্ব্বক আচমন করিয়া সঙ্কোচাপাসনা করিতে আরম্ভ করিলেন ।

কিয়ৎক্ষণ পরে রজনী সমুপস্থিত হইল । নভোমণ্ডল গ্রহনক্ষত্রকূলে সমলঙ্কৃত হইয়া বিচিত্র বসনের ন্যায় শোভা পাইতে লা-গিল । রজনীচরণ স্বচ্ছানুসারে গতা-য়াত ও কোলাহল করিতে আরম্ভ করিল । দিবাচরেরা নিদ্রায় অভিভূত হইয়া পড়িল এবং ক্রব্যাঙ্গণ যার পর নাই স্তম্ভিত হইল । ঐ সময় কৃতবর্মা, অশ্বখামা ও রূপাচার্য্য সেই বটবৃক্ষতলে উপবিষ্ট হইয়া দুঃখিত ও শোকাকুলিত চিত্তে কুরুপাণ্ড-বের ক্ষয় বৃত্তান্ত কথোপকথন করিতে লাগিলেন । তাঁহারা অস্ত্র শস্ত্রে ক্ষতবিক্ষত ও একান্ত পরিশ্রান্ত হইয়াছিলেন, সুতরাং অচিরে নিদ্রাবেশ হওয়াতে সেই বৃক্ষ-তলেই শয়ন করিলেন । দুঃখভোগে অন-ভ্যস্ত রূপ ও কৃতবর্মা অনাথের ন্যায় সেই ধরাতলে শয়ন করিবামাত্র নিদ্রায় অভি-

ভূত হইলেন । মহাবীর দ্রোণতনয় পাণ্ডব-দিগের উপর নিতান্ত ক্রুদ্ধ হইয়াছিলেন ; সুতরাং একান্ত পরিশ্রান্ত হইয়াও নিদ্রিত হইলেন না । তিনি জাগরিতাবস্থায় থাকিয়া বনের চতুর্দিকে দৃষ্টিপাত করিতে করিতে উহার মধ্যে একটি সুদীর্ঘ ন্যাগ্রোধ বৃক্ষ নিরীক্ষণ করিলেন । ঐ বৃক্ষের শাখায় অগংখ্য বায়স স্ব স্ব আবাস স্থানে শয়ন করিয়া সুখে যামিনী যাপন করিতেছিল । ঐ সময় এক গরুড়ের ন্যায় বেগবান পিঙ্গল-বর্ণ মহাকায় উলক তথায় আগমন করিল । উহার মুখ ও নখর সুদীর্ঘ । পেচক ধীরে ধীরে সেই ন্যাগ্রোধ বৃক্ষের শাখায় নিপ-তিত হইয়া কাকদিগের নিকট গমন পূর্ব্বক কাহারও কাহারও পক্ষচ্ছেদ, কাহারও কাহারও মস্তক ছেদন এবং কাহারও কাহা-রও পদ ভঙ্গ করিয়া তত্রত্য বায়সকুল নিঃশেষিত প্রায় করিল । কাককুলের কলে-বরে ঐ বৃক্ষতল একেবারে সমাচ্ছন্ন হইয়া গেল । বায়সাস্তক উলক এই রূপে বৈর নির্ঘাতন করিয়া মহা আত্মাদিত হইল ।

মহাবীর অশ্বখামা উলককে এই রূপে রজনীযোগে কৃতকার্য্য হইতে দেখিয়া সেই রূপে বৈর নির্ঘাতন করিবার মানসে মনে মনে চিন্তা করিলেন যে, এই পেচক আমারে শত্রু বিনাশ করিবার উপদেশ প্রদান করিল । এক্ষণে অরাতিবিনাশের উপযুক্ত সময়ও উপস্থিত হইয়াছে । আজি আমি দুর্গোধনের নিকট পাণ্ডবদিগের বিমাশ বিষয়ে প্রতিজ্ঞা করিয়াছি । কিন্তু উহারা বিজয়ী, বলবান্ এবং অস্ত্র শস্ত্র ও উৎসাহ শক্তি সম্পন্ন, সুতরাং সম্মুখ সংগ্রামে কথ-নই উহাদিগকে বিনাশ করিতে সমর্থ হই-ব না । এক্ষণে ধর্ম্মানুসারে যুদ্ধ করিলে বোধ হয় প্রাণ ত্যাগ করিতে হইবে । কিন্তু ছদ্মভাবে অবলম্বন করিলে নিশ্চয়ই কার্য্য সিদ্ধি ও শত্রুক্ষয় করিতে পারিব । পণ্ডিত

ব্যক্তিরা সন্দিগ্ধ বিষয় অপেক্ষা অসন্দিগ্ধ বিষয়েই হস্তক্ষেপ করা কর্তব্য বলিয়া নির্দেশ করিয়াছেন। আর ক্ষত্রধর্ম অবলম্বন করিলে লোকনিন্দিত অতি গর্হিত কার্যে প্রবৃত্ত হইতে হয়। বিশেষত নীচাশয় পাণ্ডবগণ পদে পদে শঠতা পরিপূর্ণ অতি কুৎসিত কার্যের অনুষ্ঠান করিয়াছে। তত্ত্বদর্শী ধার্মিকগণও কহিয়া গিয়াছেন যে, শত্রুপক্ষীয় সৈন্যগণ পরিশ্রান্ত, শস্ত্র বিদীর্ণ, নায়কহীন, অর্দ্ধ রাত্রি সময়ে নিদ্রিত এবং আহার, প্রস্থান বা প্রবেশে প্রবৃত্ত হইলেও তাহাদিগকে বিনাশ করা অবশ্য কর্তব্য।

প্রবল প্রতাপশালী দ্রোণতনয় এই রূপ চিন্তা করিয়া সেই রাত্রিতে নিদ্রাভিভূত পাঞ্চাল ও পাণ্ডবদিগকে বিনাশ করিতে কৃতনিশ্চয় হইয়া মাতুল রূপাচার্য্য ও ভোজরাজ কৃতবর্মাণের জাগরিত করিলেন। মহাবল পরাক্রান্ত রূপাচার্য্য ও কৃতবর্মা গাত্রোথান পূর্বক অশ্বখামার মন্ত্রণা শ্রবণে লজ্জিত হইয়া কিছুমাত্র উত্তর প্রদান করিলেন না। তখন মহাবীর দ্রোণপুত্র মহর্ষিকলি চিন্তা করিয়া বাম্পাকুল নয়নে রূপাচার্য্যকে কহিলেন, মাতুল! যাহার জন্য আমরা পাণ্ডবগণের সহিত যুদ্ধে প্রবৃত্ত হইয়াছি, নীচাশয় ভীমসেন সেই মহাবল পরাক্রান্ত একাদশ চমুপতি অদ্বিতীয় বীর কুরু-রাজকে নিহত করিয়া তাঁহার নস্তকে পদা-র্পণ পূর্বক অতি নিষ্ঠুর কার্যের অনুষ্ঠান করিয়াছে। ঐ শুভ্র, পাঞ্চালগণ সিংহনাদ, শঙ্খধ্বনি ও চুন্ডুভিন্বেশন করিয়া মহা আহ্লাদে হাস্য পরিহাস করিতেছে। শঙ্খধ্বনি মিশ্রিত তুমুল বাদ্যশব্দ পবনপরিচালিত হইয়া দশ দিক্ পরিপূর্ণ করিয়াছে। পূর্ব দিকে অশ্বগণের হেঘারব, গজযুথের বৃংহিতধ্বনি, পুরগণের সিংহনাদ, রথ সমুদায়ের লোমহর্ষণ চক্রনির্ঘোষ-শ্রুতিগোচর হইতেছে। কালের কি বিচিত্র গতি! পাণ্ডবগণ কৌরব পক্ষীয়

শত মাতঙ্গতুল্য বলশালী সর্বাস্ত্রবিদ বীর-গণকেও বিনাশ করিয়াছে। এক্ষণে সমুদায় কৌরব সৈন্যই উহাদের হস্তে বিনষ্ট হইয়াছে; কেবল আমরা তিন জন অবশিষ্ট রহিয়াছি। এক্ষণে যদি মোহ বশত আপনাদিগের বুদ্ধিব্রংশ না হইয়া থাকে, তাহা হইলে অতঃপর আমাদের কি কর্তব্য, তাহা নিশ্চয় করিয়া বলুন।

দ্বিতীয় অধ্যায় ।

তখন রূপাচার্য্য কহিলেন, হে বীর! আমি তোমার বাক্য শ্রবণ করিলাম; এক্ষণে আমি যাগ কহিতেছি, শ্রবণ কর। মনুষ্যেরা দৈব ও পুরুষকারসাধ্য কর্মে আবদ্ধ হইয়া আছে। দৈব ও পুরুষকার অপেক্ষা আর কিছুই বসবান্ নাই। একমাত্র দৈব বা একমাত্র পুরুষকার প্রভাবে কোন কার্যই সিদ্ধ হয় না। ঐ উভয়ের একত্র সমাবেশ না হইলে সিদ্ধিলাভ হওয়া নিতান্ত সুকঠিন। কি উৎকৃষ্ট, কি অপকৃষ্ট, সমস্ত কার্যই দৈব ও পুরুষকার সাপেক্ষ। পল্লভ্য পল্লভোপরি সলিল বর্ষণ করিয়া কোন ফল উৎপাদনে সমর্থ হয় না; কিন্তু কৃষ্ট ক্ষেত্রে বারি বর্ষণ করিলে প্রচুর ফল উৎপন্ন করিতে পারে। দৈবহীন পুরুষকার আর পুরুষকারহীন দৈব উভয়ই নিতান্ত নিষ্ফল। দৈব ও পুরুষকার উভয়েরই আনুকূল্য থাকিলে মনুষ্যের অবশ্যই সিদ্ধি লাভ হইয়া থাকে। ক্ষেত্র বারিধারা সংস্কৃত ও সম্যক্ কর্ষিত হইলে তাহাতে প্রচুর শস্য উৎপন্ন হয়। অনেক স্থানে দৈব পুরুষকারের অপেক্ষা না করিয়া স্বয়ংই ফল প্রদান করে, কিন্তু বিবেচক লোকেরা দৈববল অবলম্বন পূর্বক পুরুষকারেই মনোনিবেশ করিয়া থাকেন। যাহা হউক, মনুষ্যের সমস্ত কার্যই দৈব ও পুরুষকার সাপেক্ষ, সন্দেহ নাই। পুরুষকার সহকারে

কার্যে প্রবৃত্ত হইলে উহা দৈব বলযোগে সুসিদ্ধ হয় এবং সেই দৈব বল প্রভাবেই কর্মকর্তা ফল লাভ করিয়া থাকে। মনুষ্য দৈব বলশূন্য পুরুষকার প্রকাশ করিলে তাহা নিতান্ত নিষ্ফল হয়। আর অলস ও নির্বোধেরা পুরুষকারে অশ্রদ্ধা প্রদর্শন করিয়া থাকে; কিন্তু তাহা প্রাজ্ঞ ব্যক্তিদিগের মতে যুক্তিসঙ্গত নহে। কার্যের অনুষ্ঠান করিলে তাহা প্রায় নিষ্ফল হয় না। কিন্তু কার্যানুষ্ঠানে পরাশ্রয় হইলে নিশ্চয়ই অতিশয় দুঃখ ভোগ করিতে হয়। যাহা হউক, যদি কেহ কোন কার্য অনুষ্ঠান না করিয়া যদৃচ্ছাক্রমে তাহার ফল ভোগ করে আর যদি কেহ কোন কার্য অনুষ্ঠান করিয়াও তাহার ফল ভোগে বঞ্চিত হয়, তাহা হইলে সেই উভয়বিধ ব্যক্তিকেই নিতান্ত দুর্দশাপন্ন বলিতে হইবে, সন্দেহ নাই। কার্যদক্ষ ব্যক্তি অক্লেশে কালাতিপাত করিতে পারে, কিন্তু অলস কিছুতেই সুখ লাভে সমর্থ হয় না। এই জীবলোকে সুনিপুণ ব্যক্তির প্রায়ই হিতৈষী হইয়া থাকে। কার্যদক্ষ ব্যক্তি অনুষ্ঠিত কার্যের ফল ভোগে সমর্থ হউক বা না হউক, কিছুতেই নিন্দনীয় হয় না; কিন্তু যে ব্যক্তি কোন কার্যের অনুষ্ঠান না করিয়া ফল লাভ করে, সে নিতান্ত নিন্দনীয় ও সকলেরই বিদ্বেষভাজন। এই নিমিত্তই বুদ্ধিমান লোকেরা কহিয়া থাকেন যে, যে ব্যক্তি পুরুষকারকে অনাদর করে, সে আপনার অনিষ্ট সাধন করিয়া থাকে।

দৈব ও পুরুষকার ব্যতীত কোন কার্যই সিদ্ধ হয় না। যদি পুরুষকার সম্পন্ন ব্যক্তি দৈববল অবলম্বন করিয়া কোন কার্যানুষ্ঠান করে, তাহার কার্য অবশ্যই সফল হয়। সকলেরই বুদ্ধ লোকদিগের সহবাস এবং তাঁহাদিগের পরামর্শ গ্রহণ ও উপদিষ্ট কার্যের অনুষ্ঠান করা অবশ্য কর্তব্য। অভ্যাস

কালে সর্বদা বুদ্ধদিগকে পরামর্শ জিজ্ঞাসা করিবে। বুদ্ধেরা অলস বস্তু লাভ ও কার্য সিদ্ধির মূল কারণ। যে ব্যক্তি বুদ্ধের বাক্য শ্রবণ করিয়া পুরুষকার প্রদর্শন করে, সে অচিরে ফল লাভে সমর্থ হয়। যে ব্যক্তি ক্রোধ, ভয় ও লোভপরতন্ত্র হইয়া কাহারও সহিত মন্ত্রণা না করিয়া কার্যানুষ্ঠান করে, সে অচিরে শ্রীভ্রষ্ট হয়। দেখ, অদূরদর্শী লোকপ্রকৃতি দুর্ব্যোধান হিতবুদ্ধিসম্পন্ন ব্যক্তিদিগকে অনাদর প্রদর্শন ও অসাধু লোকের পরামর্শ গ্রহণ পূর্বক আশাদিগের কর্তৃক বারংবার নিবারিত হইয়াও গুণশালী পাণ্ডবগণের সহিত বৈরাচরণে প্রবৃত্ত হইয়াছিল; সেই নিমিত্তই এক্ষণে পরিতাপিত হইতেছে। আমরা সেই পাপাত্মার অভিশ্রাবানুসারে কার্যানুষ্ঠান করিতেছি বলিয়া আশাদিগের এই রূপ তরঙ্গর দুর্দশা সমুপস্থিত হইয়াছে। আমি ঐ দুঃখাত্মার নিমিত্তই দুঃখসাগরে নিমগ্ন হইয়াছি। এক্ষণে দুঃখপ্রভাবে আমার বুদ্ধি নিতান্ত আকুল হওয়াতে আমি কোন ক্রমেই সং বিবেচনা করিতে সমর্থ হইতেছি না। মনুষ্য মোহাক্ষ হইলে সুহৃদ্ব্যক্তিকে সং পরামর্শ জিজ্ঞাসা করিবে। তৎকালে সেই সুহৃদই তাহার বুদ্ধি, বিনয় ও শ্রেয়োলাভের একমাত্র কারণ; সুতরাং তাহার বাক্যানুসারে কার্যানুষ্ঠানই সর্বতোভাবে কর্তব্য। অতএব চল, আমরা রাজা ধৃতরাষ্ট্র, গান্ধারী ও বিদুরের নিকট গমন পূর্বক এই বিষয়ের পরামর্শ জিজ্ঞাসা করি। তাঁহারা বিবেচনা পূর্বক যাহা হিতকর বলিয়া অবধারণ করিবেন, আমরা তাহাই করিব। কার্য আরম্ভ না করিলে কদাচ ফল লাভ হয় না; কিন্তু পুরুষ প্রকাশ পূর্বক কার্যারম্ভ করিলেও যদি তাহা নিষ্ফল হয়, তবে দৈবকেই তাহার প্রতিবন্ধক বলিতে হইবে, সন্দেহ নাই।

তৃতীয় অধ্যায় ।

সঞ্জয় কহিলেন, মহারাজ ! তখন মহাবীর অশ্বখামা রূপাচার্য্যের সেই বস্মার্থযুক্ত বাক্য শ্রবণে শোকানলে দগ্ধ হইয়া ক্রুরভাবে তাঁহারে ও ক্রুবস্মারে সম্বোধন পূর্বক কহিলেন, হে বীরদ্বয় ! ব্যক্তিমাত্রেরই বুদ্ধিবৃত্তি পৃথক্ পৃথক্ । সকলেই অন্য অপেক্ষা আপনারে সমধিক বুদ্ধমান্ জ্ঞান করিয়া নিরন্তর আত্মবুদ্ধির প্রশংসা ও পরবুদ্ধির নিন্দা করে । এক এক বিষয়ে যাহাদের বুদ্ধির ঐক্য হয়, অন্য অন্য বিষয়ে তাহাদিগেরই বুদ্ধি পরস্পর নিতান্ত বিপরীত হইয়া উঠে । মনুষ্যগণের চিত্তবৈচিত্র্যই বুদ্ধি বৈচিত্র্যের কারণ । সুবিজ্ঞ বৈদ্য যেমন ব্যাধি নির্ণয় করিয়া রোগ শাস্তির নিমিত্ত বুদ্ধি প্রভাবে যথাবিধি ঔষধ নির্ণয় করেন, তদ্রূপ অন্যান্য মানবগণও স্বীয় স্বীয় কার্য্য সিদ্ধির নিমিত্ত যথোপযুক্ত বুদ্ধি আশ্রয় করিয়া উপায় নির্ধারণ করিয়া থাকে । অনেক মনুষ্যের বুদ্ধির ঐক্য হওয়া দূরে থাকুক, এক ব্যক্তির বুদ্ধিও সকল সময়ে সমান থাকে না । দেখ, মনুষ্য যৌবন কালে যে বুদ্ধি প্রভাবে বিমোহিত হয়, প্রৌঢ়াবস্থায় তাহার আর সে বুদ্ধি থাকে না এবং প্রৌঢ়াবস্থায় যে বুদ্ধির প্রাদুর্ভাব হয়, বৃদ্ধা-বস্থা উপস্থিত হইলেই সে বুদ্ধি একবারে তিরোহিত হইয়া যায় । হে ভোজরাজ !

বসম দুঃখ বা অধিক সম্পদের সময় মনুষ্যের বুদ্ধি বিকৃত হইয়া থাকে । মনুষ্য-মাত্রই আপনার বুদ্ধি অনুসারে কার্য্য নিশ্চয় করিয়া তাহাতে প্রবৃত্ত হয়, সুতরাং বুদ্ধিকেই কার্য্যের উদ্যোগকারিণী বলিতে হইবে । লোকে মারণাদি কার্য্য অতি উৎকৃষ্ট বিবেচনা করিয়াই প্রীত মনে সেই সকল নিন্দনীয় কার্য্যের অনুষ্ঠানে প্রবৃত্ত হয় । ফলত সকল লোকেই স্ব স্ব বুদ্ধি প্রভাবে

বিবিধ কার্য্য নির্ণয় করিয়া তাহার অনুষ্ঠান করে ।

আজি বিষম দুঃখপ্রভাবে আমার যে রূপ বুদ্ধি উপস্থিত, তাহা আপনাদের নিকট ব্যক্ত করিলাম । আমি স্থির করিয়াছি যে, ঐ রূপ কার্য্য করিলেই আমার শোক বিনষ্ট হইবে । দেখ, প্রজাপতি ত্রিকা প্রজাগণের সৃষ্টি ও তাহাদিগের ভিন্ন ভিন্ন কার্য্য নির্ণয় করিয়া পৃথক্ পৃথক্ বর্ণে পৃথক্ পৃথক্ গুণ নিবোজিত করিয়াছেন । তিনি ত্রাক্ষণে বেদ, ক্ষত্রিয়ে তেজ, বৈশ্যে দক্ষতা ও শূদ্রে সর্ব বর্ণের অনুকূলতা প্রদান করিয়াছেন । অতএব অদান্ত ত্রাক্ষণ, নিশ্তেজ ক্ষত্রিয়, অদক্ষ বৈশ্য ও প্রতিকূলাচারী শূদ্র সকলের নিকটেই অসাব্য ও নিন্দনীয় বলিয়া পরিগণিত হইয়া থাকে । আমি সুপূজিত ত্রাক্ষণকুলে জন্ম গ্রহণ করিয়াছি বটে, কিন্তু ভাগ্যদোষে আমারে ক্ষত্রিয়ধর্ম্ম আশ্রয় করিতে হইয়াছে । যদি আমি ক্ষত্রিয়ধর্ম্ম অবগত হইয়া ত্রাক্ষাধর্ম্ম আশ্রয় পূর্বক শান্ত ভাব অবলম্বন করি, তাহা হইলে নিশ্চয়ই আমারে নিন্দনীয় হইতে হইবে । আমি দিব্যাস্ত্র ও দিব্য শরাসন গ্রহণ করিয়াছি, সুতরাং পিতৃধর্ম্মের প্রতিকার না করিলে জনসমাজে কি রূপে আমার বাক্য ক্ষুণ্ণ হইবে । অতএব আজি আমি নিশ্চয়ই ক্ষত্রিয়ধর্ম্মানুসারে পিতা ও রাজা তুর্গোধানের পদবীতে পদাৰ্পণ করিব । আজি ব্যায়াম-পরিশ্রান্ত পাঞ্চালগণ জয়লাভে প্রফুল্ল হইয়া কবচ পরিত্যাগ পূর্বক বিশ্বস্ত চিত্তে নিদ্রাগত হইলে আমি রাত্রিযোগে শিবিরাত্যন্তরে গমন পূর্বক দেবরাজ যেমন দানবদল দমন করিয়াছিলেন, তদ্রূপ তাহাদিগকে সংহার করিব । আজি বৃষ্টিদ্বারা প্রভূত বীরগণ অনলদগ্ধ অরণ্যের ন্যায় বিনষ্ট হইবে । আজি আমি পশুসদন পিনাকপাণি রুদ্রের ন্যায় পাঞ্চালগণ মধ্যে প্রবেশ করিয়া

তাহাদের ও পাণ্ডবগণের প্রাণ সংহার পূর্বক শাস্তি লাভ করব। আজি আমি পাঞ্চালগণের শরীরে ভূমণ্ডল পরিবৃত্ত করিয়া পিতার ঋণ পরিশোধ করিব। আজি পাঞ্চালগণ দুর্ব্যোধন, কর্ণ, ভীষ্ম ও আমার পিতার পথে পদার্পণ করিবেন। আজি আমি পশুহস্তা শিবের ন্যায় রজনী-যোগে ধৃষ্টদ্যুম্নকে নিপাতিত করিয়া নিশিত খজ্রাঘাতে পাঞ্চালরাজ ও পাণ্ডবগণের নিদ্রিত সন্তান সন্ততির ও তৎপক্ষীয় সৈন্য সমুদায়ের প্রাণ সংহার পূর্বক কৃতকার্য ও সুখী হইব।

চতুর্থ অধ্যায়।

তখন রূপাচার্য্য কহিলেন, বৎস! আজি ভাগ্যক্রমে তোমার বৈরনির্ঘাতনে বুদ্ধি হইয়াছে। স্বয়ং পুরন্দরও তোমার নিবারণে সমর্থ নহেন। এক্ষণে তুমি বর্ষ্ম পরিত্যাগ পূর্বক এই রাত্রি বিজ্রাম কর, কল্য প্রভাতে যুদ্ধযাত্রা করিবে। আমিও কৃতবর্ষ্মার সমভিব্যাহারে বর্ষ্মধারণ ও রথারোহণ পূর্বক তোমার অনুগমন করিব। তাহা হইলে তুমি নিশ্চয়ই পাঞ্চালগণ ও তাহাদের অনুচরগণের বধ সাধনে সমর্থ হইবে। তোমার বহু দিন ক্রমাগত জাগরণ হইতেছে; অতএব আজি রাত্রিতে নিদ্রাসুখ অনুভব কর; তাহা হইলে বিজ্রাম ও স্থিরচিত্ত হইয়া নিঃসন্দেহই অরাতিগণকে বিনাশ করিতে পারিবে। আমি তোমার সমভিব্যাহারে থাকিলে এবং কৃতবর্ষ্মা তোমারে রক্ষা করিলে অন্যের কথা দূরে থাকুক, দেবরাজ ইন্দ্রও তোমারে পরাজয় করিতে সমর্থ হইবেন না। তোমার ও আমার নিকট অনেক দিব্যাস্ত্র বিদ্যমান আছে, আর মহাধনুর্জর কৃতবর্ষ্মাও রণপণ্ডিত; অতএব আজি আমরা নিদ্রাসুখ অনুভব করিয়া অমহীন হইলে কল্য প্রাতঃকালে একত্র সম-

বেত হইয়া সমস্ত শত্রু সংহার পূর্বক যার পর নাই প্রীতি প্রাপ্ত হইব। হে দ্রোণতনয়! আজি তুমি নিরুদ্ধেগে নিদ্রিত হইয়া যামিনী যাপন কর। কল্য প্রভাতে অরাতিগণের শিবিরমধ্যে প্রবেশ ও স্বীয় নামোচ্চারণ পূর্বক শত্রুগণকে বিনাশ করিয়া সমস্ত মহামুরঘাতী সুররাজের ন্যায় পরম সুখে বিহার করিতে পারিবে। পূর্বে মহাত্মা বিষ্ণু যেমন দৈত্যসেনা পরাজয় করিয়াছিলেন, তদ্রূপ তুমিও পাঞ্চাল সৈন্যগণকে পরাজয় করিতে সমর্থ হইবে। কি আমি ও কৃতবর্ষ্মা, আমরা পাণ্ডবগণকে পরাজয় না করিয়া কখনই সমর হইতে নিবৃত্ত হইব না। হয় আমরা পাণ্ডবগণের সহিত পাঞ্চালদিগকে বিনাশ করিব, না হয় তাহাদিগের হস্তে নিহত হইয়া স্বর্গ প্রাপ্ত হইব। ফলত আমি সত্য কহিতেছি, কাল প্রভাতে কৃতবর্ষ্মার সহিত সর্বপ্রকারে তোমার সহায়তা করিব।

হে মহারাজ! মহাত্মা রূপাচার্য্য এই রূপ হিত কথা কহিলে মহাবীর অশ্বখামা রোষাক্রণ নয়নে তাহার প্রতি দৃষ্টিপাত করিয়া কহিলেন, মাতুল! আতুর, অমর্ষিত, চিন্তাব্যাপ্ত ও কামুক ব্যক্তির কখনই নিদ্রাসুখ অনুভবে সমর্থ হয় না। আজি অমর্ষ প্রভাবে আমার নিদ্রা বিচ্ছেদ হইয়াছে। দেখুন, ইচ্ছালোকে পিতৃবধ স্মরণে অপেক্ষা আর কি অধিক কষ্টকর হইতে পারে! পিতৃবধ স্মরণেই অহোরাত্র আমার হৃদয় দগ্ধ হইতেছে, কিছুতেই তাহার শাস্তি হইতেছে না। পাপাআরা যে রূপে আমার পিতারে নিহত করিয়াছে, তাহা আপনার অবিদিত নাই। তাদৃশ পিতৃবধ রূতান্ত্র অবশে মাদৃশ কোন ব্যক্তি মুহূর্ত্তকালও জীবন ধারণ করিতে সমর্থ হয়? এক্ষণে সমরাস্রমে ধৃষ্টদ্যুম্নকে বিনাশ না করিয়া কোন ক্রমেই আমার জীবন ধারণে

বাসনা হইতেছে না। ঐ দু'আ আমার পিতারে বিনাশ করিয়াছে বলিয়া তাহারে এবং তাহার সমভিব্যাহারী দগকে বিনাশ করিব; আর রাজা দুর্গোধন ভগ্নোক্ত ও সমরাজ্ঞে নিপতিত হইয়া আমার সমক্ষে যে রূপ বিলাপ করিয়াছেন, তাহা শ্রবণ করিয়া কোন পাষণ্ডদয়ের হৃদয় বিদীর্ণ না হয়? কোন নির্দয় ব্যক্তি বাস্পবেগ সম্বরণ করিতে পারে? আমি বিদ্যমান থাকিতে মিত্রপক্ষের একপ পরাজয় হওয়াতে আমার শোকসাগর সমুচ্ছলিত হইতেছে। আমি পাঞ্চালগণের বিনাশ সাধনে একাগ্রাচর হইয়াছি; অতএব আজি নিদ্রা বা সুখানুভবের সম্ভাবনা কি? আমার বোধ হয়, বাসুদেব ও অর্জুন পাণ্ডবপক্ষীয়দিগকে রক্ষা করিলে ইন্দ্রও যে তাহাদিগের পরাক্রম সহ্য করিতে সমর্থ হন না, ইহা আমি বিলক্ষণ অবগত আছি, তথাপি কোন রূপেই ক্রোধবেগ সম্বরণে সমর্থ হইতেছি না। এক্ষণে আমারে এই ক্রোধ হইতে মুক্ত করে, একপ কোন লোকও নৈর্জিগোচর হইতেছে না; সুতরাং আমি যাহা স্থির করিয়াছি, তাহাই আমার পক্ষে শ্রেয়। দূতমুখে মিত্রপক্ষের পরাভব ও পাণ্ডবগণের জয়লাভ বৃত্তান্ত শ্রবণ করিয়া অবধি আমার হৃদয় ক্রোধানলে দগ্ধ হইতেছে; অতএব আজি রাত্রিতেই নিদ্রিত শত্রুগণকে বিনাশ পূর্বক সুস্থচিত্ত হইয়া বিশ্রাম ও নিদ্রাসুখ অনুভব করিব।

পঞ্চম অধ্যায়।

তখন রূপাচার্য্য কহিলেন, বুদ্ধিশীল ব্যক্তি সতত শুশ্রূষা পরতন্ত্র ও জিতেন্দ্রিয় হইলেও সুচারু রূপে ধর্ম্মার্থ জ্ঞাপন অবগত হইতে পারে না। আর বুদ্ধমান ব্যক্তিও বিনয় শিক্ষা না করিলে ধর্ম্মার্থ নিগূঢ় অসমর্থ হয়। দর্শী যেমন নিম্নত সুপে নিমগ্ন

থাকিয়াও তাহার রসাস্বাদনে বঞ্চিত হয়, তদ্রূপ জড় ব্যক্তি সর্ব্বদা পণ্ডিতের উপাসনা করিয়াও ধর্ম্মজ্ঞ হইতে পারে না; কিন্তু জিজ্ঞাসা যেমন স্পর্শমাত্রেই সপরসের আস্বাদগ্রহ করে, তদ্রূপ বুদ্ধিমান ব্যক্তি অতি অল্পক্ষণ পণ্ডিতের উপদেশ করিয়াই ধর্ম্মের মর্ম্মগ্রহ করিতে পারেন। গুরুশুশ্রূষাতঃপর বুদ্ধিমান জিতেন্দ্রিয় ব্যক্তির অচিরে সর্ব্বশাস্ত্রজ্ঞ হন, তাঁহারা কদাচ সর্ব্বসম্মত বিষয় লইয়া বিবাদে প্রবৃত্ত হন না। দুর্কিনীত পাপাত্মা লোক সজ্জনের কল্যাণকর উপদেশ উল্লেখন করিয়া মহাপাপে লিপ্ত হয়। সুহৃদগণ পাপ হইতে নিবৃত্ত করিবার চেষ্টা করিলে বাহারা তাঁহাদের বাক্যানুসারে পাপানুষ্ঠানে বিরত হয়, তাহারা সম্পদভাজন হইতে পারে; আর বাহারা সুহৃদের বাক্যে উপেক্ষা করিয়া পাপ কার্য্যে বিরত না হয়, তাহারা নিশ্চয়ই ক্রীড়ন্ত হয়। লোকে ক্ষিপ্ত ব্যক্তিরে যেমন বিবিধ বাক্য দ্বারা শাস্ত্র করে, তদ্রূপ বন্ধুগণ বিবিধ উপদেশ প্রদান পূর্বক আত্মীয়কে পাপকার্য্যে পরাজুথ করেন। বাহারা সুহৃদ বাক্যে উপেক্ষা করিয়া পাপপরাজুথ না হয়, তাহাদিগকে অবশ্যই অবসন্ন হইতে হয়। প্রাজ্ঞ লোকেবা বিজ্ঞ সুহৃদকে পাপানরত দেখিলে যথাসক্তি বারংবার উপদেশ প্রদান করেন। অতএব হে দ্রোণতনয়! তুমি কল্যাণকর বিষয়ে মনোনিবেশ, ও আত্মদমন করিয়া আমার বাক্য রক্ষা কর, নচেৎ নিশ্চয়ই তোমারে অনুতাপ করিতে হইবে। প্রসুপ্ত, ন্যস্তশস্ত্র, রথহীন, বাহন বিহীন, শরণাগত ও মুক্তকেশ ব্যক্তিদিগকে বধ করা নিতান্ত ধর্ম্মবিরুদ্ধ। পাঞ্চালগণ আজি কবচ পরিত্যাগ পূর্বক মৃত ব্যক্তিদিগের ন্যায় বিচেতন হইয়া বিশ্বস্ত চিত্তে নিদ্রাগত হইবে। যে পামর সেই অবস্থায় তাহাদিগের বিদ্রোহাচরণ করিবে, তাহারা অগাধ নরকে

মগ্ন হইতে হইবে, সন্দেহ নাই। তুমি ইহা-
লোকে অস্ত্রবেত্তাদিগের অগ্রগণ্য বলিয়া
বিখ্যাত হইয়াছ। অনুমাত্র পাপও তো-
মারে কখন স্পর্শ করিতে পারে নাই।
অতএব কল্য সুৰ্য্যোদয় হইলে প্রকাশ্য যুদ্ধে
শক্রগণকে জয় করিও। তুমি গর্হিত কার্যের
অমুষ্ঠান করিলে উহা শুরু বস্ত্রে শোণিত-
পাতের ন্যায় নিতান্ত অপ্ৰীতিকর হইবে।

তখন অশ্বখামা কহিলেন, মাতুল! আ-
পনি যাহা কহিলেন, উহা যথার্থ বটে। কিন্তু
পূর্বে পাণ্ডবগণ কর্তৃক ধর্মের সেতু শতাব্দী
বিদলিত হইয়াছে। দেখুন, আমার পিতা
অস্ত্র ত্যাগ করিলে দুরাত্মা ধৃষ্টদ্যুম্ন ভূপ-
তিগণের ও আপনাদিগের সমক্ষে তাঁহার
প্রাণ সংহার করিয়াছে। মহাবীর কণের
রথচক্র ভূতলে পোখিত হইলে অর্জুন
সেই দিপদকালে সূতপুত্রকে নিহত করি-
য়াছে এবং শিখণ্ডীরে অগ্রসর করিয়া ন্যস্ত-
শস্ত্র নিরায়ুধ ভীষ্মদেবের বিনাশে কৃতকার্য
হইয়াছে। সত্যকি প্রায়োপবিষ্ট মহাবলু-
ঙ্কির ভূরিঅধারে এবং ভীমসেন অন্যান্য
গদাযুদ্ধে দুর্গোদধনকে নিপাতিত করিয়াছে।
আজি দূতমুখে ভগ্নোক্ত রাজা দুর্গোদধনের
করণ বিলাপ শ্রবণ করিয়া আমার হৃদয়
বিদীর্ণ হইতেছে। হে মাতুল! পাপাত্মা
পাণ্ডব ও পাঞ্চালগণ এই রূপে বারংবার
ধর্মসেতু ভগ্ন করিয়াছে; আপনি কি
নিমিত্ত সেই পামরদিগের নিন্দা করেন
না। আমি এই রজনীতে পিতৃহস্তাদিগকে
সুপ্তাবস্থায় নিপাতিত করিব, ইহাতে যদি
আমার কীট অথবা পতঙ্গ যোনিতে জন্ম
গ্রহণ করিতে হয়, তাহাও শ্রেয়। এক্ষণে
আমি অতীষ্ট সাধনে নিতান্ত তৎপর হই-
য়াছি। এক্ষণে আমার নিদ্রা ও সুখ বাসনা
কোথায়? আজি আমারে এই অব্যবসায়
হইতে নিরস্ত করিতে পারে, একপ লোক
তুমিও জন্ম গ্রহণ করে নাই, করিবেও না।

সঞ্জয় কহিলেন, মহারাজ! প্রতাপান্বিত
অশ্বখামা এই কথা বলিয়া রথে অশ্ব সংযো-
জন পূর্বক বিপক্ষগণের শিবিরভিমুখে
যাত্রা করিলেন। মহাত্মা কৃতবর্মা ও কৃপা-
চার্য্য তদর্শনে তাঁহারে কহিলেন, হে মহা-
বীর! তুমি কি অভিপ্রায়ে রথ যোজন
করিলে সত্য করিয়া বল। আমরা তোমার
দুঃখে দুঃখিত ও সুখে সুখী হইয়া থাকি,
অতএব আমাদের প্রতি কোন আশঙ্কা
করিও না। তখন অশ্বখামা পিতৃবধ রক্তাস্ত
স্মরণ পূর্বক কোপে কম্পিত হইয়া তাঁহাদি-
গের নিকটে আপনার অভিপ্রায় ব্যক্ত করিয়া
কহিলেন, দুরাত্মা ধৃষ্টদ্যুম্ন নিশিত শরনিকরে
সমস্ত যোদ্ধার প্রাণ সংহার করিয়া আমার
অস্ত্রত্যাগী পিতারে নিপাতিত করিয়াছে।
আজি আমি সেই বর্মবিহীন পাপপরায়ণ
দ্রুপদপুত্রকে নিহত করিব। দুরাত্মা ধৃষ্ট-
দ্যুম্ন যাহাতে আমার হস্তে পশুর ন্যায়
নিহত হইয়া শস্ত্রবিজিত লোকে গমন ক-
করিতে না পারে, তাহাই আমার উদ্দেশ্য।
তোমরা বর্ম ধারণ এবং কার্ম্মক ও খড়্গ
গ্রহণ পূর্বক আমার সহিত আগমন কর।
দ্রোণপুত্র এই বলিয়া বিপক্ষগণের ভিমুখে
গমন করিতে লাগিলেন। কৃপাচার্য্য এবং
কৃতবর্মাও তাঁহার পশ্চাৎ পশ্চাৎ ধাবমান
হইলেন। তৎকালে সেই বীরত্রয়কে যজ্ঞ-
স্থানসমিদ্ধ ভূতানত্রয়ের ন্যায় বোধ হইতে
লাগিল। অনন্তর তাঁহারা সেই সুপ্ত জনপূর্ণ
শিবির সম্মিথানে সমুপস্থিত হইলেন। মহা-
রথ অশ্বখামা কৃপাচার্য্য ও কৃতবর্মারে
আমন্ত্রণ পূর্বক শিবিরদ্বারে গমন করিয়া
রথবেগ সন্মরণ করিলেন।

ষষ্ঠ অধ্যায় ।

বৃতরাষ্ট্র কহিলেন, হে সঞ্জয়! মহাবীর
কৃতবর্মা ও কৃপাচার্য্য অশ্বখামারে দ্বারদেশে
অবস্থিত অবলোকন করিয়া কি করিলেন,
তাহা কীৰ্ত্তন কর।

সঞ্জয় কহিলেন, মহারাজ ! এই রূপে মহারথ অশ্বখামা ক্রোধভরে শিবিরদ্বারে আগমন করিয়া তথায় চন্দ্র ও সূর্যের ন্যায় প্রভাসম্পন্ন এক মহাকায় পুরুষকে অবলোকন করিলেন। তাঁহার বদনমণ্ডল বিচিত্র সহস্র নেত্র সমলঙ্কৃত; বাহু সকল সুদীর্ঘ, শূল ও নাগাজ্ঞদ বিভূষিত এবং আসাদেশ ব্যাদিত, দংষ্ট্রাকরাল ও অগ্নিশিখায় প্রদীপ্ত; তাঁহার পরিধান শোণিতাদ্র ব্যাঘ্রচর্ম, উত্তরীয় কৃষ্ণাজিন। সেই নাগযজ্ঞোপবীতধারী ভীষণদর্শন মহাপুরুষের আকার ও বেশ বর্ণনা করা নিতান্ত দুষ্কর। তাঁহারে দেখিলে পর্বত সকলও বিদীর্ণ হইয়া যায়। তৎকালে সেই দিব্য পুরুষের মুখ, নাসিকা, কর্ণযুগল ও সহস্র নেত্র হইতে তেজোরশি নির্গত হইতেছিল। সেই তেজঃপুঞ্জ হইতে শঙ্খচক্রগদাধারী অসংখ্য রুবীকেশ প্রাচুর্ভূত হইতে লাগিলেন।

মহারথ অশ্বখামা সেই সর্বভূত ভয়ঙ্কর অভূতাকার মহাপুরুষকে অবলোকন করিয়াও কিছুমাত্র ভীত না হইয়া তাঁহার প্রতি দিব্যাস্ত্রজাল নিক্ষেপ করিতে আরম্ভ করিলেন। মহাকায় পুরুষও বড়বানল যেমন সমুদ্রের সলিলপ্রবাহ গ্রাস করিয়া থাকে, তক্রূপে দ্রোণপুত্র নিক্ষিপ্ত শরানিকর গ্রাস করিতে লাগিলেন। তখন মহাবীর অশ্বখামা আপনার দিব্যাস্ত্রজাল নিতান্ত নিষ্ফল হইল দেখিয়া তাঁহার প্রতি এক প্রদীপ্ত অগ্নিশিখার ন্যায় রথশক্তি নিক্ষেপ করিলেন। প্রলয়কালে মহোল্লাসে যেমন সূর্যদেবকে আহত করিয়া নভোমণ্ডল হইতে পরিভ্রষ্ট হয়, তক্রূপে সেই প্রদীপ্ত রথশক্তি মহাপুরুষকে আহত করিয়া বিদীর্ণ ও নিপতিত হইল। তখন মহাবীর অশ্বখামা এক আকাশ সদৃশ নীলবর্ণ সুরণমুষ্টি সমলঙ্কৃত খড়্গ বিধ্বংসকারিত ভীষণ ভুজঙ্গনের ন্যায় কোষ হইতে নিষ্কাশিত করিয়া তাঁহার

প্রতি নিক্ষেপ করিলেন। খড়্গ দিব্য পুরুষের দেহে নিপতিত হইয়া গর্ভমন্ড্যে লুপ্তায়িত নকুলের ন্যায় তিরোহিত হইল। মহাবীর অশ্বখামা তদর্শনে নিতান্ত ক্রোধাবিষ্ট হইয়া তাঁহার প্রতি এক ইন্দ্রধ্বজ সদৃশ প্রজ্জ্বলিত গদা নিক্ষেপ করিলেন। তিনিও তৎক্ষণাৎ তাহা গ্রাস করিয়া ফেলিলেন।

এই রূপে সমস্ত অস্ত্র শস্ত্র ক্ষয় হইলে মহাবীর অশ্বখামা ইতস্তত দৃষ্টিপাত পূর্বক দেখিলেন, সেই মহাপুরুষের তেজোরশি বিনির্গত অসংখ্য রুবীকেশ এককালে আকাশমণ্ডল সমাচ্ছন্ন করিয়াছেন। তিনি সেই অভূত ব্যাপার স্বচক্ষে প্রত্যক্ষ করিয়া রূপাচার্যের বাক্য স্মরণ পূর্বক সমুদ্র চিত্তে চিন্তা করিতে লাগিলেন, যে ব্যক্তি সুরুদের হিতকর বাক্য অপ্রিয় বোধে অনাদর করে, তাহারে আমার ন্যায় বিপদসাগরে নিমগ্ন হইয়া শোক প্রকাশ করিতে হয়, সন্দেহ নাই। যে ব্যক্তি শাস্ত্রসম্মত পথ অতিক্রম করিয়া শত্রু সংহারের অভিলাষ করে, তাহারে ধর্মপথ পরিভ্রষ্ট হইয়া কুপথে প্রতিহত হইতে হয়। বুদ্ধ লোকে সর্বদা এই রূপ উপদেশ প্রদান করিয়া থাকেন যে, গো, ব্রাহ্মণ, নৃপ, স্ত্রী, সখা, মাতা, গুরু এবং মৃতপ্রায়, জড়, স্পন্দ, নিদ্রিত, ভীত, মদমত্ত, উন্মত্ত ও অনবহিত ব্যক্তিদিগের প্রতি কদাচ শস্ত্র প্রহার করবে না। আমি সেই শাস্ত্রবিহিত সনাতন পথ অতিক্রম পূর্বক কুপথে পদার্পণ করিয়া এই ঘোরতর বিপদে নিপতিত হইয়াছি। বিজ্ঞ ব্যক্তিদিগের মতে কোন মহৎ কার্যের অনুষ্ঠান পূর্বক অশক্তি নিবন্ধন ভীত হইয়া তাহা হইতে বিরত হওয়াই ঘোরতর বিপদের বিষয়। দৈব অপেক্ষা পুরুষকার কদাচ গুরুতর নহে। যদি কেহ কোন কার্যের অনুষ্ঠানে প্রবৃত্ত হইয়া দুর্দৈব বশত উহা সিদ্ধ করিতে না পারে, তাহা

হইলে তাহারে ধর্মপথপরিভ্রম ও বিপদগ্রস্ত হইতে হয়। যদি কোন ব্যক্তি অগ্রে প্রতিজ্ঞা সহকারে কোন কার্যানুষ্ঠানে প্রবৃত্ত হইয়া পশ্চাৎ ভয় প্রযুক্ত তাহা হইতে বিবৃত হয়, তাহা হইলে সেই ব্যক্তি অগ্রে ঐ প প্রতিজ্ঞা করা নিতান্ত অজ্ঞতার কার্য বলিয়া স্বীকার করিতে হইবে। এক্ষণে আমি অসং কার্য সংসাপনে উদ্যত হইয়াছি বলিয়া আমার এই মহৎ ভয় উপস্থিত হইয়াছে। এই যে মহাপুরুষ উদ্যত দৈব দণ্ডের ন্যায় এই স্থানে দণ্ডায়মান হইয়া আমার প্রতিবন্ধকতাচরণ করিতেছেন, আমি দাব্যবাহ চিন্তা করিয়াও ইহা করে বিদিত হইতে সমর্থ হইতেছি না; বোধ হয়, তিনি আমার অধর্ম প্রবৃত্তি কলুষত বুদ্ধির ভয়ঙ্কর ফল স্বরূপ। আমি কদাচ সমরে পাজু হই নাই, এক্ষণে কেবল দৈবই আমাকে সমর-বিমুখ করিলেন, সন্দেহ নাই। অতঃপর দৈব বল প্রাপ্ত না হইলে আমি কদাচ এই কার্য সাধনে সমর্থ হইব না। অতএব এক্ষণে দেবাদিদেব মহাদেবের শরণাপন্ন হই, তিনিই আমার এই দুর্দৈব শান্তি করিয়া দিবেন। ভগবান্ উমাপতি তপ ও বিক্রম প্রভাবে সমস্ত দেবগণকে অতিক্রম করিয়াছেন; অতএব তাঁহারই আশ্রয় গ্রহণ করা কর্তব্য।

সপ্তম অধ্যায়।

হে মহারাজ! আচার্য্যতনয় অশ্বখামা এই কপে কৃতনিশ্চয় হইয়া রথ হইতে অবতরণ পূর্বক ভগবান্ ভবানীপতিরে প্রণাম করিয়া কহিলেন, হে দেবেশ! আমি অতি কুদ্রাশয়। এক্ষণে বিশুদ্ধ অন্তঃকরণে আ-
 আপহার প্রদান পূর্বক তোমার পূজা করিব। হে দেব! তুমি উগ্র, স্থানু, শিব, রুদ্র, শর্ক, ঐশান ও ঐশ্বর; তুমি গিরিশ, বরদ ও ভবভাবন; তুমি শিতিকণ্ঠ, অজ, ও গুরু; তুমি দক্ষযজ্ঞনাশক হর; তুমি

বিশ্বরূপ, বিক্রপাক্ষ ও বহুরূপী; তুমি উমাপতি ও মহাগণপতি; তুমি শ্মশানবাসী, খটু অধারী; তুমি জটিল; তুমি স্তম্ভ, স্তম্ভ ও স্তূপমান; তুমি অনোঘ, তুমি শক্র, তুমি ক্রান্তবাসী, নিলোচিত, অনহা ও দুর্নিবার; তুমি ব্রহ্মস্রোত, ব্রহ্ম ও ব্রহ্মচারী; তুমি ব্রহ্মধারী, তপস্বী ও তাপসগণের গতি; তুমি অনন্ত, পারিষদপ্রিয়, ত্রিলোচন, ধনাধ্যক্ষ ও ক্ষিপ্রমুখ; তুমি পার্শ্বতার সুদয়-বল্লভ ও ক্ষন্দো পিতা; তুমি পঞ্চ, রূষ-বাহন ও সক্ষম বাসধারী; তুমি পার্শ্বতীর ভূষণ ও তাঁহা তনুরত; তুমি শ্রেষ্ঠ হইতেও শ্রেষ্ঠতর; তোমা অপেক্ষা শ্রেষ্ঠ আর কেহই নাই; তুমি অস্ত্রশস্ত্র বিশারদ; তুমি দিগন্ত ও দেশরক্ষক; তুমি চন্দ্রমৌলি ও হিরণ্যকবচধারী; অতএব আমি একাগ্র-চিন্তে তোমার শরণাগত হইলাম। যদি আমি আসন্নবর্তী বিপদ হইতে উদ্ধার হইতে পারি, তাহা হইলে তোমাকে স্বীয় শরীরস্থ পঞ্চ ভূত উপহার প্রদান পূর্বক পূজা করিব।

হে মহারাজ! মহাত্মা অশ্বখামা এই রূপ স্তব করিলে তাঁহার সম্মুখে এক কাঞ্চনময় বেদী সহসা প্রাক্তভূত হইল। ভগবান্ ছত্ৰাশন স্বীয় তেজঃপ্রভাবে দিগ্ভাণ্ডল ও আকাশমণ্ডল উদ্ভাসিত করিয়া সেট বেদী-মধ্যে বিরাজমান হইলেন। বিচিত্র অঙ্গ-ধারী উদ্যতবাহু অসংখ্য করচরণ সম্পন্ন বহু মন্তক শোভিত উজ্জলবদন উজ্জলনেত্র পার্শ্বতাকার মহাগণ সকল তথায় উপস্থিত হইল। তাহাদিগের আকার কুকুর, বরাহ ও উক্টের ন্যায়; মুখ অশ্ব, শৃগাল, ভল্লুক, মাক্কর, ব্যাঘ্র, দ্বীপি, বায়স, বানর, শুক, অজগর, হংস, সারস, চাস, কূর্ম; নর, শিশু-মার, পারাবত, তিমি, নকুল, বক, মহাম-কর, শোন, মেঘ ও ছাগের ন্যায়; তাহাদি-
 গের মধ্যে কেহ কেহ সহস্রলোচন, কাহার

কাহারও উদর অতি রূহৎ ও অঙ্গ ক্লশ, কেহ
কেহ মস্তক বিহীন, কেহ কেহ দীপ্তনেত্র ও
দীপ্ত জিহ্বা সম্পন্ন এবং কাহারও কেশ,
কাহারও কণ ও কাহারও বা গাত্রলোম
তামবর্ণ। উহাদের মধ্যে কেহ কেহ শঙ্খের
ন্যায় ধবল। কেহ কেহ শঙ্খমাল্যধারী এবং
কেহ কেহ শঙ্খশব্দের ন্যায় অতি গভীর কণ্ঠ
স্বর সম্পন্ন, কেহ কেহ জটাজবহারী, কেহ কেহ
পঞ্চাশখা সম্পন্ন, কেহ কেহ মুণ্ডতমুণ্ড, কাহা-
রও কাহারও চার দন্ত, কাহারও কাহারও চা-
রি জিহ্বা, কাহারও কাহারও উদর অতিক্লশ,
কাহারও কাহারও কণ গর্দভের ন্যায়, কেহ
কেহ কিরীট ও উষ্মীধারী, কেহ কেহ মুণ্ড-
মেখলা সমলঙ্কৃত, কেহ সর্পাকিরীট শোভিত,
কেহ কেহ সর্পাঙ্গধারী, কেহ কেহ বিবিধ
ভূষণে বিভূষিত, কাহারও কাহারও কেশক-
লাপ কুঞ্চিত এবং কাহারও কাহারও মস্তক
পদ্ম ও উৎপলে সুশোভিত। উহাদের মধ্যে
কেহ কেহ শতশ্রী, কেহ কেহ বজ্র, কেহ
কেহ মুষল, কেহ কেহ ভূষণ্ডী, কেহ কেহ
পাশ, কেহ কেহ দণ্ড, কেহ কেহ ধ্বজ, কেহ
কেহ পতাকা, কেহ কেহ ঘণ্টা, কেহ কেহ
পরশু, কেহ কেহ লণ্ড, কেহ কেহ সূণা,
কেহ কেহ খড়্গ এবং কেহ কেহ বা শরপরা-
পূর্ণ তুণীর ধারণ করিয়াছে। কাহারও কাহা-
রও কলেবর পঞ্চলিঙ্গ, কেহ কেহ শুক্লাবর
ও শুক্ল মাল্যধারী এবং কেহ কেহ নীল
ও কেহ কেহ পিঙ্গলবর্ণ।

এ সময় তাহারা রুদ্ধাশ্রুতঃকরণে ভেরী, শঙ্খ,
মৃদঙ্গ, ঝঞ্ঝর, আনক ও গোমুখ প্রভৃতি বিবিধ
বাদ্য বাদিত করিতে লাগিল। কেহ কেহ
গান, কেহ কেহ নৃত্য এবং কেহ কেহ লঙ্ঘন ও
কেহ কেহ লক্ষ্য প্রদান করিতে আরম্ভ করিল।
কেহ কেহ মহাবেগে ধাবমান হইল; উহাদের
কেশকলাপ বায়ুবেগে উড়ুড়ীন হইতে লাগিল;
কেহ কেহ মত্ত মাতঙ্গের ন্যায় বারংবার
গর্জন করিতে আরম্ভ করিল। এই সমস্ত

চূর্নসহ বিক্রম সম্পন্ন নানারাগ রঞ্জিত
বসনধারী বভ্রুচিত অঙ্গ সমলঙ্কৃত শঙ্ক-
নাশক ঘোরকপ মাংসভোজী বসাসোণিত-
পায়ী পরিচারকগণমধ্যে কেহ কেহ চূড়া
সম্পন্ন, কেহ কেহ অতিশয় হস্ত, কেহ কেহ
অতিশয় দীর্ঘ, কাহার কাহারও উদর পিঠ-
রের ন্যায়, কাহার কাহারও ঠাণ্ড লম্বিত,
কাহার কাহারও মেট ও অণ্ড অতি রূহৎ।
উহারা চন্দ্র সূর্য্য ও গ্রহ নক্ষত্রপরিপূর্ণ
নভোমণ্ডল ভ্রমণে প্রানয়ন এবং চতুর্দিক
লোক সকলকে বিনাশ করতে সমর্থ।
উহারা প্রতিনিয়ত নিরন্তরে ভবানীপতির
ক্রোধসহ্য করিয়া থাকে। উহারা নিরন্তর
যেচ্ছাচার পরায়ণ এবং ত্রৈলোক্যের ঈশ্ব-
রেরও ঈশ্বর। উহারা হিংসাদেষ শূন্য হইয়া
সর্বদা আমোদ প্রমোদে কাল যাপন করে।
এ সকল বাক্যবিন্যাসবিশারদ পারিষদগণ
অষ্ট ঐশ্বর্য্য লাভ করিয়াও গর্জিত হয় নাট।
ভগবান্ শূলপাণি উহাদের কার্য্য দর্শনে
সাতিশয় বিস্মিত হইয়া থাকেন এবং উহা-
দের কর্তৃক কায়মনোবাক্যে আরাধিত হইয়া
ত্রিস পুত্রের ন্যায় উহাদিগকে রক্ষা
করেন। উহারা রুদ্ধের একান্ত ভক্ত। উহারা
চতুর্দিক সোমরস এবং রোমার্ষট চিত্তে
রাক্ষসদিগের শোণিত ও বসাপান করিয়া
থাকে। উহারা বেদাধ্যয়ন, ব্রহ্মচর্য্য, তপস্যা
ও ইন্দ্রিয়সংযম দ্বারা ভগবান্ শিশিশেখ-
বকে প্রসন্ন করিয়া তাঁহার সলোকতা লাভ
করিয়াছে। কালত্রয়ের অধিপতি রুদ্ধদেব
ও দেবী পার্বতী এই সমস্ত আত্মানুরূপ
পারিষদের সহিত একত্র ভোজন করিয়া
থাকেন।

অনন্তর এই সমস্ত ভূত বিবিধ বাদিত্র
বাদন, মৃদঙ্গ, গর্জন, আক্রোশ প্রকাশ
ও সিংহনাদ পরিত্যাগ পূর্ব্বক তেজ দর্শন
ও মহিমা বর্ণন করিবার মানসে স্ব স্ব প্রভা-
জাল বিস্তার করিয়া মহাদেবকে স্তব

করিতে করিতে দ্রোণপুত্রের প্রতি ধাবমান হইল। সেই ভীমদর্শন ভূতগণকে নিরীক্ষণ করিলে ত্রিলোকস্থ সমস্ত ব্যক্তিরই ভয় জন্মে, কিন্তু মহাবল পরাক্রান্ত অশ্বখামা তাহাদিগকে দেখিয়া কিছুমাত্র ভীত না হইয়া ভগবান্ শঙ্করকে আপনার দেহ উপহার প্রদান করিবার নিমিত্ত প্রস্তুত হইলেন। তৎকালে তাঁহার কাস্মুক সমিধ, শাণিত শরনিকর পবিত্র ও আত্মা হবিঃ স্বরূপ হইল। অনন্তর তিনি রৌদ্রকর্মা রুদ্রদেবকে সৌম্য মন্ত্রে আপনার দেহ উপহার প্রদান পূর্বক কৃতাজলিপুটে স্তব করিতে লাগিলেন। হে ভগবন! আমি আগ্নিরসকূলে জন্ম পরিগ্রহ করিয়াছি, অদ্য এই বিপদকালে তোমার প্রতি ভক্তিভাবে সমাধিবলে ছতাশনে আত্মদেহ আছতি প্রদান করিতেছি, তুমি এই উপহার প্রতিগ্রহ কর। সমস্ত ভূত তোমাতেই বিদ্যমান আছে এবং তুমিও সর্বভূতে বিরাজমান রহিয়াছ; প্রধান প্রধান গুণ সমুদায় তোমাতেই অবস্থান করিতেছে। এক্ষণে আমি শক্রপরাজয়ে অসমর্থ হইয়া তোমার নিকট হবিঃস্বরূপ অবস্থান করিতেছি, তুমি আমারে প্রতিগ্রহ কর। মহাবীর অশ্বখামা এই বলিয়া সেই প্রদীপ্ত প্লাবকযুক্ত বেদীতে আরোহণ পূর্বক ছতাশনমধ্যে প্রবেশ করিলেন। তখন ভগবান্ রুদ্র তাঁহারে ছতাশনমধ্যে প্রবিষ্ট, নিশ্চেষ্ট ও উর্দ্ধবাহু নিরীক্ষণ করিয়া হাস্যমুখে কহিলেন, হে বীর! মহাত্মা কৃষ্ণ সত্য, শৌচ, আর্জব, দান, তপ, নিয়ম, ক্ষমা, রতি, বুদ্ধি ও বাক্যে আমার আরাধনা করিয়াছেন; সুতরাং কৃষ্ণ অপেক্ষা আমার আর কেহই প্রিয়তম নাই। সেই কৃষ্ণের সম্মান রক্ষা ও তোমার বলবীৰ্য্য পরীক্ষা করিবার নিমিত্ত আমি পাঞ্চালগণকে সুরক্ষিত করিয়া মায়াবল বিস্তার করিয়াছিলাম; কিন্তু

পাঞ্চালেরা কালগ্রাস্ত হইয়াছে, আজি তাহাদিগের জীবন রক্ষা হইবে না। ভূতভাবন ভগবান্ ভবানীপতি এই বলিয়া অশ্বখামারে এক সুনির্মল খজ্জা প্রদান পূর্বক তাঁহার শরীরে প্রবেশ করিলেন। তখন মহাবীর অশ্বখামা পুনরায় শঙ্করের তেজঃপ্রভাবে পূর্বাপেক্ষা অধিকতর উদ্ভাসিত হইয়া যুদ্ধার্থে মহাবেগে শিবিরে ধাবমান হইলেন। ভূত ও রাক্ষসগণ সাক্ষাৎ মহাদেবের ন্যায় দ্রোণতনয়কে শক্রশিবিরে প্রবেশ করিতে দেখিয়া অদৃশ্য ভাবে তাঁহার উভয় পাশ্বে গমন করিতে লাগিলেন।

অষ্টম অধ্যায়।

দ্রুতরাষ্ট্র কহিলেন, সঞ্জয়! মহারথ অশ্বখামা শিবিরে প্রবেশ করিলে কৃতবর্মা ও কৃপাচার্য্য কি কার্য্য করিলেন? তাঁহারা কি ভয় ব্যাকুলা বা সামান্য রক্ষকগণ কর্তৃক অলক্ষিত ভাবে নিবারিত হইয়া পলায়ন করিলেন অথবা শিবির ভেদ এবং সোমক ও পাণ্ডবগণকে সংহার পূর্বক পাঞ্চালদিগের হস্তে নিহত হইয়া দুর্ব্যোধনের ন্যায় ধরাশায়ী হইলেন?

সঞ্জয় কহিলেন, মহারাজ! মহাত্মা দ্রোণপুত্র শিবির প্রবেশে সমুদ্যত হইলে মহারথ কৃতবর্মা ও কৃপাচার্য্য দ্বারদেশে অবস্থান করিতে লাগিলেন। মহাবীর অশ্বখামা তাহাদিগকে তথায় অবস্থিত দেখিয়া আনন্দিত চিত্তে মৃদু স্বরে কহিলেন, হে বীরদ্বয়! আপনারা যত্ন করিলে নিদ্রাগত হতাবশিষ্ট বিপক্ষপক্ষীয় যোধগণের কথা দূরে থাকুক, সমুদায় ক্ষত্রিয়কুল সংহার করিতে পারেন। আমি এক্ষণে শিবির মধ্যে প্রবেশ করিয়া কৃতাস্ত্রের ন্যায় পরিভ্রমণ করিব। যেন এ স্থানে কোন ব্যক্তি আপনাদের নিকট পরিভ্রাণ না পায়, আমার এইমাত্র প্রার্থনা। মহাবাহু দ্রোণকুমার

এই বলিয়া গম্য দ্বার পরিহার পূর্বক অন্য স্থান দিয়া নিভয় চিত্তে পাণ্ডবগণের শিবিরে প্রবেশ করিয়া সর্বাঙ্গে নিঃশব্দ পদ-সঞ্চারে ধৃষ্টদ্যুম্নের শয়নাগার সন্নিধানে সমুপস্থিত হইলেন । ঐ সময় সমরপরিশ্রান্ত পাঞ্চালগণ বিশ্বস্ত চিত্তে গাঢ় নিদ্রায় অভিভূত হইয়াছিলেন । মহাবীর অশ্বখামা তদু-র্শনে আহ্লাদিত চিত্তে ঋপদপুত্রের শয়ন গৃহে প্রবেশ পূর্বক তাঁহারে দিব্যাস্তরণ সমাবৃত সুগন্ধি মালা পরিশোভিত বিচিত্র ক্ষৌমমণ্ডিত শয়নীয়ে অকূতোভয়ে নিদ্রাগত দেখিয়া পদাঘাত দ্বারা প্রবোধিত করিলেন । সমরতুর্মুদ ধৃষ্টদ্যুম্ন অশ্বখামার পদ-প্রহারে জাগরিত ও উশ্বিত হইয়া তাঁহারে দ্রোণপুত্র বলিয়া জানিতে পারিলেন । তখন মহাবল অশ্বখামা ঋপদতনয়কে শয্যা হইতে সমুখিত দেখিয়া দুই হস্তে তাঁহার কেশ ধারণ পূর্বক তাঁহারে ধরাতলে নিষ্পেষিত করিতে লাগিলেন । মহাবীর ধৃষ্টদ্যুম্ন দ্রোণপুত্রের প্রভাবে এই রূপ দুর্বলতাপ্রাপ্ত হইয়া নিদ্রা ও ভয় প্রযুক্ত প্রতিবিধানের কোন উপায়ই করিতে পারিলেন না । অশ্বখামা চরণ দ্বারা তাঁহার বক্ষঃস্থল ও কণ্ঠদেশ আক্রমণ করিয়া তাঁহারে পশুর ন্যায় নিধন করিতে সমুদ্যত হইলেন । তখন ঋপদকুমার নখর প্রহারে দ্রোণপুত্রের কলেবর ক্ষত বিক্ষত করিয়া অস্পর্শ স্বরে কহিলেন, আচার্য্যপুত্র ! অস্ত্রপ্রহার দ্বারা অবিলম্বে আমারে সংহার কর, তাহা হইলে আমি তোমার প্রসাদে পবিত্র লোকে গমন করিতে পারিব । মহাবীর অশ্বখামা ঋপদতনয়ের সেই অব্যক্ত বাক্য শ্রবণ করিয়া কহিলেন, রে কুলাঙ্গার ! আচার্য্যহস্তাদিগের কোন লোকেই গমনে অধিকার নাই ; অতএব তোর উপর শস্ত্র নিক্ষেপ করা নিতান্ত অক-র্ষব্য । কোঁপাশ্বিত দ্রোণপুত্র এই বলিয়া সিংহ যেমন মদমত্ত মাতঙ্গের মর্ম্ম পীড়ন

করে, তদ্রূপ সুদারুণ পদাঘাতে ধৃষ্টদ্যুম্নের মর্ম্ম পীড়ন করিতে লাগিলেন । তখন তত্রত্য মহিলাগণ ও ধৃষ্টদ্যুম্নের রক্ষক সকল তাঁহার আর্তনাদে জাগরিত হইয়া তাঁহারে ভূতাপহত জ্ঞান করিয়া ভয়ে বাত্‌স্পত্তি করিতেও সমর্থ হইল না । মহাবীর অশ্বখামা এই রূপে ধৃষ্টদ্যুম্নকে নিপাতিত করিয়া রথে আরোহণ পূর্বক সিংহনাদে দশ দিক্ পরিপূরিত করত অন্যান্য শত্রু সংহারার্থ গমন করিতে লাগিলেন ।

মহারথ দ্রোণপুত্র ধৃষ্টদ্যুম্নের গৃহ হইতে বহির্গত হইলে যাবতীয় মহিলা ও রক্ষক-গণের ভীষণ ক্রন্দন কোলাহল সমুখিত হইল । ধৃষ্টদ্যুম্নের পত্নীগণ স্বামীকে নিহত দেখিয়া হাহাকার করিতে লাগিলেন । তাঁহাদের রোদনশব্দে অন্যান্য ক্ষত্রিয়গণ সহসা জাগরিত হইয়া বর্ম্ম ধারণ পূর্বক কোলাহলের কারণ জিজ্ঞাসা করিলে রমণী-গণ ভয়বিহ্বল চিত্তে কাতর স্বরে কহিতে লাগিলেন । তোমরা সত্বরে আগমন কর । ঐ দেখ, একজন পুরুষ ধৃষ্টদ্যুম্নকে সংহার করিয়া রথে আরোহণ পূর্বক অবস্থান করিতেছে । ঐ ব্যক্তি মনুষ্য কি নিশাচর, তাহা আমরা কিছুই নির্ণয় করিতে পারিলাম না । তখন শিবিরস্থ প্রধান প্রধান যোদ্ধগণ সহসা অশ্বখামারে পরিবেষ্টন করিলেন । মহাবীর দ্রোণকুমার রুদ্রাস্ত্র দ্বারা সেই সমাগত বীরগণকে নিপাতিত করিয়া অমতিদূরে নিদ্রিত উত্তমোজারে অবলোকন পূর্বক তাঁহার সুমীপে সমুপস্থিত হইলেন এবং অচিরে পাদ দ্বারা তাঁহার কণ্ঠ ও বক্ষঃস্থল আক্রমণ করিয়া তাঁহারে শমনসদনে প্রেরণ করিলেন । মহাবীর যুধামন্যু উত্তমোজারে রাক্ষসহস্তে নিহত বিবেচনা করিয়া সত্বরে গদা গ্রহণ পূর্বক মহাবেগে অশ্বখামার হৃদয়ে আঘাত করিলেন । তখন দ্রোণপুত্র বেগে ধাবমান হইয়া তাঁহারে ভূতলে নি-

ক্ষেপ পূর্বক পশুর ন্যায় সংহার করিয়া ফেলিলেন ।

যুধামন্যু নিহত হইলে মহাবীর অশ্বখামা ইতস্তত শয়ান মহারথগণের প্রতি ধাবমান হইয়া খজ্ঞাঘাতে যজ্ঞস্থলে বিকম্পিত পশুগণের ন্যায় একে একে তাহাদের প্রাণ সংহার করিলেন এবং ক্ষণকাল মধ্যে শিবিরমধ্যস্থ ন্যস্তশস্ত্র পরিশ্রান্ত যোদ্ধাগণকে সমুদায় হস্তী অশ্বের সহিত নিপাতিত করিয়া রুধিরাক্ত কলেবরে কালান্তক যমের ন্যায় দৃষ্ট হইতে লাগিলেন । সেই করাল করবালধারী মহাবীরের গাত্রে অসি-বিচ্ছিন্ন ইতস্তত সঞ্চারিত বীরগণের শোণিত-ধারা সংলগ্ন হওয়াতে তাঁহারে অতি ভীষণ অপূর্ব প্রাণী বলিয়া বোধ হইতে লাগিল । সমরে অগ্রসর যোদ্ধাগণ অশ্বখামার অলৌকিক রূপ দর্শনে নিতান্ত ব্যথিত হইয়া পরস্পরের মুখাবলোকন করিতে আরম্ভ করিলেন এবং অনেকে তাঁহারে রাক্ষস বিবেচনা করিয়া নেত্র নিমীলিত করিতে লাগিলেন ।

এই রূপে মহাবীর অশ্বখামা সাক্ষাৎ কৃতান্তের ন্যায় শিবিরে পরিভ্রমণ করিতে করিতে দ্রৌপদীর পাঁচ পুত্র ও অবশিষ্ট সোমকগণকে অবলোকন করিলেন । শরাসনধারী মহারথ দ্রৌপদীতনয়গণ সন্মুখ কোলাহলে জাগরিত হইয়া ধৃষ্টদ্যুম্নের নিধন-বার্তা শ্রবণ পূর্বক অশ্বখামারে শরনিকরে সমাচ্ছন্ন করিতে লাগিলেন । প্রভদ্রকগণ ও মহাবীর শিখণ্ডী তাঁহাদিগের সমরশব্দে প্রবোধিত হইয়া শরজালে দ্রৌণপুত্রকে নিপীড়িত করিতে আরম্ভ করিলেন । তখন সমরপরাক্রান্ত মহারথ অশ্বখামা সেই শরজালবর্ষী বীরগণকে দর্শন করিয়া সিংহনাদ করিতে লাগিলেন এবং পিতৃবধ রক্তান্ত স্মরণ করিয়া সরোষ নয়নে সহস্র চন্দ্র পরিশোভিত চর্ম ও সুবর্ণমণ্ডিত দিব্য খজ্ঞা গ্রহণ

পূর্বক রথ হইতে অবতীর্ণ হইয়া দ্রৌপদীতনয়গণের প্রতি ধাবমান হইলেন । তিনি সর্বাঙ্গে প্রতিবিক্রোর কুক্ষিদেশ ছেদন করিলে ঐ মহাবীর নিহত হইয়া ধরাতলে শয়ন করিলেন । তখন প্রতাপশালী সুতসোম প্রাস দ্বারা অশ্বখামারে বিদ্ধ করিয়া খজ্ঞা উত্তোলন পূর্বক তাঁহার প্রতি ধাবমান হইলেন । মহাত্মা দ্রৌণপুত্র তদর্শনে ক্রোধভরে সুতসোমের অসি সমবেত বাহু ছেদন করিয়া তাঁহার পার্শ্বদেশে খজ্ঞাঘাত করিলেন । মহাবীর সুতসোম সেই আঘাতে ব্যথিত হইয়া ধরাতলে নিপতিত হইলেন । তখন নকুলপুত্র মহাবল শতানীক বাহুবলে অশ্বখামার রুদয়ে রথচক্র নিক্ষেপ করিলেন । মহাবীর দ্রৌণকুমার নকুলনন্দনের প্রহারে নিতান্ত ক্রুদ্ধ হইয়া তাঁহারে ভূতলে নিপাতন পূর্বক তাঁহার মস্তক ছেদন করিয়া ফেলিলেন । তখন মহাবীর শ্রুতকর্মা পরিঘ ধারণ পূর্বক মহাবেগে ধাবমান হইয়া অশ্বখামার মধ্যদেশে আঘাত করিলেন । আচার্য্যপুত্র তদর্শনে করাল করবাল দ্বারা তাঁহার আশ্রয়-দেশ ক্ষত বিক্ষত করিতে লাগিলেন । মহাবীর শ্রুতকর্মা আচার্য্যতনয়ের খজ্ঞাঘাতে বিকৃতমুখ ও নিহত হইয়া ধরাতলে নিপতিত হইলেন । তখন মহারথ শ্রুতকীর্ত্তি অশ্বখামার প্রতি অনবরত শর বর্ষণ করিতে লাগিলেন । মহাবীর দ্রৌণপুত্র চর্ম দ্বারা শ্রুতকীর্ত্তির সেই শরবর্ষণ নিবারণ করিয়া তাঁহার কুণ্ডলসম্বলিত মস্তক ছেদন করিয়া ফেলিলেন ।

অনন্তর ভীষ্মনিহস্তা শিখণ্ডী প্রভদ্রকগণের সহিত মিলিত হইয়া মহাবীর অশ্বখামারে বিবিধ অস্ত্রে নিপীড়িত করিয়া তাঁহার ললাটে এক বাণ নিক্ষেপ করিলেন । মহাবল পরাক্রান্ত দ্রৌণকুমার তদর্শনে কোপান্বিত হইয়া খজ্ঞা দ্বারা শিখণ্ডীরে ছুই

খণ্ড করিয়া ফেলিলেন । দ্রুপদতনয় নিহত হইলে অসিমাগবিশারদ মহাবীর অশ্বখামা ক্রোধভরে ধাবমান হইয়া যাবতীয় প্রভ-
দ্রক, বিরাট রাজার হতাবশিষ্ট সৈন্য সমু-
দায়, দ্রুপদের পুত্র পৌত্র ও সুরুক্ষণ এবং
অন্যান্য বীরগণকেও ছেদন করিতে লাগি-
লেন । ঐ সময় পাণ্ডব পক্ষীয় যোদ্ধগণ দেখি-
লেন যে, রক্তবদনা লোহিতনয়না রক্তমা-
ল্যানুলেপনা রক্তবস্ত্রধারিণী কৃষ্ণবর্ণা কাল-
রাত্রি অসংখ্য অশ্ব কুঞ্জর ও ন্যস্তশস্ত্র মুক্ত-
কেশ মহারথদিগকেও ভীষণ পাশে বদ্ধ
করিয়া প্রস্থানে সমুদ্যত হইয়াছেন । হে
মহারাজ ! কুরুপাণ্ডবের ভীষণ সংগ্রাম
সমুপস্থিত হওয়া অবধি পাণ্ডব পক্ষীয় যো-
দ্ধগণ প্রতিরাত্রিতেই স্বপ্নে দেখিতেন যে, ঐ
করালবদনা কামিনী তাঁহাদিগকে লইয়া
গমন করিতেছেন এবং মহারথ দ্রোণতনয়
তাঁহাদের সংহারে প্রবৃত্ত হইয়াছেন ।

এই রূপে মহাবীর দ্রোণকুমার সেই দৈ-
বোপহত প্রাণিগণকে সিংহনাদে বিভ্রাসিত
ও নিপাতিত করিলেন । বীরগণ তৎকালে
পূর্বকালীন স্বপ্নদর্শন স্মরণ করিয়া উহা
দৈবপীড়ন বলিয়া বুঝিতে পারিলেন । অন-
ন্তর পাণ্ডবশিবিরস্থ সহস্র সহস্র ধনুর্ধর
বীর সেই শব্দে জাগরিত হইয়া উঠিলেন ।
তখন মহাবীর অশ্বখামা সাক্ষাৎ কৃতান্তের
ন্যায় কাহারও চরণদ্বয় ছেদন, কাহারও
জঘন বিদারণ এবং কাহারও বা পার্শ্বদেশ
ভেদ করিতে লাগিলেন । ঐ সময় কেহ
কেহ গজ ও কেহ কেহ অশ্ব দ্বারা উন্মথিত
হইল এবং অনেকে নিতান্ত পেষিত হইয়া
আর্তস্বর পরিত্যাগ করিতে লাগিল । এই
রূপে সেই সমস্ত নিপাতিত বীরগণে রণভূমি
পরিপূর্ণ হইলে, ঐ বীর কে, কোন্ জাতি
হইতে উৎপন্ন হইয়াছে, কাহার কণ্ঠস্বর
শ্রুতিগোচর হইতেছে, এই রূপ নানাপ্রকার
ক্রন্দন ধ্বনি সমুপস্থিত হইল । ঐ সময় দ্রোণ-

নন্দন অশ্বকের ন্যায় পরাক্রম প্রকাশ
পূর্বক শস্ত্রহীন কবচশূন্য পাণ্ডবসৈন্য ও
সৃঞ্জয়গণকে যমালয়ে প্রেরণ করিতে লাগি-
লেন । তৎকালে অনেকে অশ্বখামার শস্ত্র-
পাতে নিতান্ত ভীত হইয়া দ্রুত বেগে পলা-
য়ন করত নিদ্রাবেশ প্রভাবে বিসংজ্ঞ ও
নিপতিত হইল । অনেকে মোহযুক্ত ও উরু-
স্তম্ভে অভিভূত হইয়া পড়িল এবং অনেকে
নিতান্ত ভীত ও একান্ত অবসন্ন হইতে
লাগিল ।

অনন্তর মহাবীর অশ্বখামা সেই ভীম
নিয়ন সম্পন্ন রথে পুনরায় আরোহণ পূর্বক
ধনুর্ধারণ করিয়া শরনিকরে অনেকানেক
বীরকে যমালয়ে প্রেরণ করিলেন । কত-
গুলি বীর উন্মিত এবং কতগুলি তাঁহার
অভিমুখে ধাবমান হইতেছিল, তিনি তাহা-
দিগকে দূর হইতেই মৃত্যুমুখে নিপাতিত
করিলেন । তৎপরে তিনি রথচক্র দ্বারা
অনেককে প্রমথিত করিয়া অবশিষ্ট শত্রু-
গণের প্রতি শরনিকর বর্ষণ পূর্বক ধাবমান
হইলেন এবং অব্যবহিত পরেই বিচিত্র চর্ম্ম
ও আকাশের ন্যায় শ্যামল অসি গ্রহণ
করিয়া রণস্থলে বিচরণ করিতে লাগিলেন ।
এই রূপে দ্রোণতনয় মত্ত মাতঙ্গ যেমন
অতি বিস্তীর্ণ হৃৎ আলোড়িত করে, তদ্রূপ
সেই শত্রুশিবির বিক্ষেপিত করিতে আ-
রম্ভ করিলেন ।

ঐ সময় নিদ্রায় একান্ত কাতর অনেক
বোদ্ধা সেই তুমুল সংগ্রামশব্দে নিতান্ত
ভীত ও উন্মিত হইয়া ইতস্তত ধাবমান
হইল । তন্মধ্যে কেহ কেহ অতি কর্কশ স্বরে
চীৎকার ও কেহ কেহ অসম্বদ্ধ প্রলাপ
করিতে লাগিল । তৎকালে অনেকে অস্ত্র
শস্ত্র ও বসন প্রাপ্ত হইল না । অনেকের
কেশ আলুলিত হইয়া গেল । কেহই কাহারে
জ্ঞাত হইতে সমর্থ হইল না । কেহ কেহ
গাত্রোপধান করিতে উদ্যত হইয়া নিপতিত

হইল। কেহ কেহ ইতস্তত ভ্রমণ করিতে আরম্ভ করিল। হস্তী ও অশ্বেরা বন্ধন ছেদন করিয়া বিষ্ঠা মূত্র পরিত্যাগ করিতে লাগিল এবং কতগুলি দলবদ্ধ হইয়া ধাবমান হইল। কতগুলি মনুষ্য নিতান্ত ভীত হইয়া ভূতলে বিলীন হওয়াতে হস্তী ও অশ্বগণ তাহাদিগকে চরণ দ্বারা নিষ্পেষিত করিয়া ফেলিল।

এই রূপে সেই রণস্থল তুমুল হইয়া উঠিলে রাক্ষসগণ রুষ্ট মনে সিংহনাদ পরিত্যাগ করিতে লাগিল। সেই সিংহনাদ শব্দে দিগ্ভ্রুগণ ও নভোমণ্ডল পরিপূর্ণ হইয়া গেল। হস্তী ও অশ্বগণ সেই ভীষণ শব্দ শ্রবণে বন্ধন ছেদন পূর্বক শিবিরস্থিত ব্যক্তিদিগকে বিমর্দিত করত ইতস্তত ধাবমান হইল। তখন উহাদিগের চরণসমুখিত ধলিজালে সেই রজনীযোগে শিবিরমধ্যে অন্ধকার দ্বিগুণ পরিবর্দ্ধিত হইয়া উঠিল। তখন সকলেই জ্ঞান শূন্য হইয়া কে পিতা, কে পুত্র, কে ভ্রাতা, কিছুই স্থির করিতে পারিল না। হস্তী হস্তযথাকে ও অশ্ব অশ্বগণকে অতিক্রম করিয়া তাড়িত, সমাহত, ভূতলে পতিত ও মর্দিত করিতে লাগিল। ঐ সময় ক্ষুণ্ণোন্মিত অন্ধকারাচ্ছন্ন জ্ঞান শূন্য মনুষ্যাগণ কালপ্রেরিত হইয়াই যেন আত্মপক্ষ বিনাশে প্রবৃত্ত হইল। তখন দ্বারপালেরা দূরদেশ ও শিবিররক্ষকেরা শিবির পরিত্যাগ পূর্বক ভয়ে প্রাণপণে পলায়ন করিতে লাগিল। তৎকালে কেহই কাহারে চিনিতে পারিল না। সকলেই বন্ধুবান্ধব পরিত্যাগ পূর্বক পলায়ন করত গোত্র ও নামোচ্চারণ করিয়া হা তাত! হা পুত্র! বলিয়া চীৎকার করিতে আরম্ভ করিল। অনেকে হাহাকার শব্দ করিতে করিতে ভূতলে শয়ান হইল। মহাবীর অশ্বখামা তদর্শনে পলায়মান ব্যক্তিদিগকে আক্রমণ করিতে লাগিলেন।

ঐ সময় অনেক ক্ষত্রিয় প্রাণ রক্ষার্থে ভয়ে শিবির হইতে পলায়নে উদ্যত হইল। ভোজরাজ কৃতবর্মা ও মহাবীর রূপাচার্য্য দ্বারদেশেই তাহাদিগকে নিহত করিতে লাগিলেন। অনেকে অস্ত্র শস্ত্র ও কবচ পরিত্যাগ পূর্বক আলুলায়িত কেশে কুতাঞ্জলিপুটে দণ্ডায়মান হইলেন। রূপ ও কৃতবর্মা তথাপি তাহাদিগকে পরিত্যাগ করিলেন না। ঐ সময় তাহারা উভয়ে দ্রোণপুত্রের প্রিয়চিকীর্ষু হইয়া শিবিরের তিন স্থানে অগ্নি প্রদান করিলেন। অগ্নি প্রজ্বলিত হওয়াতে শিবির আলোকময় হইলে আচার্য্য-তনয় অশ্বখামা করে করবারি ধারণ পূর্বক বিচরণ করত যাহারা তাহার অভিযুখে আগমন ও যাহারা ভয়ে পলায়ন করিতেছিল, তাহাদিগকে বিনাশ করিতে লাগিলেন। তাহার খজ্ঞাঘাতে অনেকে দ্বিখণ্ড হইয়া ভূতলে নিপতিত হইল। দীর্ঘকলেবর হস্তী, অশ্ব ও মনুষ্যাগণ চীৎকার করিয়া ভূতলে নিপতিত হইতে লাগিল। তাহাদের কলেবরে পৃথিবী এককালে সমাকীর্ণ হইয়া গেল। এই রূপে অসংখ্য মনুষ্য নিহত হইলে বহুসংখ্যক কবচ সমুখিত হইয়া ইতস্তত ধাবমান হইল। তখন মহাবীর অশ্বখামা কোন কোন বীরের আয়ুধ ও অঙ্গদযুক্ত বাহু, কাহারও মস্তক, কাহারও করিশৃঙ সদৃশ উরু, কাহারও পাদ, কাহারও পৃষ্ঠ, কাহারও পার্শ্ব, কাহারও মধ্যদেশ ও কাহারও কণ ছেদন করিয়া ফেলিলেন এবং কাহার কাহারও ক্ষুদ্রদেশে আঘাত করিয়া তাহার মস্তক শরীরমধ্যে প্রবেশিত করিয়া দিলেন। তৎকালে তাহার প্রভাবে অনেকেই সমরপরাজুথ হইল।

মহাবীর অশ্বখামা এই রূপে অসংখ্য মনুষ্য সংহার পূর্বক বিচরণ করিতে আরম্ভ করিলেন। ঐ সময় রজনী ঘোরতর অন্ধকারে আচ্ছন্ন ও অতি ভয়ানক হইয়া উঠিল।

অনেকে দ্রোণতনয়ের হস্তে নিহত ও অনেক দৃঢ়তর সমাহত হইয়া সেই মৃত হস্তী অশ্ব ও রথসম্মুল, যক্ষরাক্ষস সমাকীর্ণ সমরস্থলে নিপতিত হইল। অসংখ্য লোক পিতা, ভ্রাতা ও পুত্রের নিমিত্ত আক্ষেপ করিতে লাগিল। ঐ সময় কেহ কেহ কহিল, ধৃতরাষ্ট্রতনয়েরা ক্রোধাবিস্ট হইয়া যে কার্য সম্পাদনে সমর্থ হয় নাই; আজি ছুরাআ রাক্ষসগণ সেই কার্য সংসাধন করিল। পাণ্ডবগণ এখানে উপস্থিত না থাকাতেই আমাদিগের এই রূপ দুর্দশা ঘটিয়াছে। বামুদেবপরিরক্ষিত ধনঞ্জয়েকে কি অমুর, কি গন্ধর্ব্ব, কি যক্ষ, কি রাক্ষস, কেহই পরাজয় করিতে সমর্থ হয় না। ঐ মহাবীর ব্রাহ্মণপ্রিয়, সত্যবাদী, দান্ত ও পরম দয়ালু। শত্রুপক্ষ নিদ্রিত, প্রমত্ত, ন্যস্তশস্ত্র, বন্ধাঞ্জলি, ধাবমান বা যুক্তকেশ হইলে তিনি কখনই তাহাদিগকে বিনাশ করেন না। হায়! আজি ছুরাআ রাক্ষসগণ কি ঘোরতর নৃশংস কার্যের অনুষ্ঠান করিল! হে মহারাজ! অসংখ্য লোক এই রূপ বিলাপ ও পরিতাপ করিতে করিতে ভূতলশায়ী হইল।

অনন্তর যুহর্ত্তকালমধ্যে মনুষ্য ও অন্যান্য জীবগণের তুমুল কোলাহল তিরোহিত হইয়া গেল। বমুদেব শোণিতসিক্ত হওয়াতে সেই ঘোরতর রজোরানি এককালে অদৃশ্য হইল। তখন মহাবীর অশ্বখামা, পশুপতি যেমন পশু বিনাশ করেন, তদ্রূপ কি শয়ান, কি ধাবমান, কি যুধ্যমান, সকলকেই সংহার করিতে লাগিলেন। ঐ সময় অনেকে ছতাশনে দগ্ধ ও অশ্বখামার আঘাতে নিপীড়িত হইয়া পরস্পরকে বিনাশ করিতে আরম্ভ করিল। মহাবীর দ্রোণতনয় এই রূপে অর্দ্ধ রাত্রিমধ্যে পাণ্ডবদিগের সমুদায় সৈন্য শমনসদনে প্রেরণ করিলেন। অসংখ্য হস্তী, অশ্ব ও মনুষ্যগণ নিহত হওয়াতে ঐ ব্যক্তিতে রাক্ষস ও পিশাচগণের

আনন্দের আর পরিমীমা রহিল না। তাহারা পুত্রকলত্র সমভিব্যাহারে তথায় সমাগত হইয়া শোণিত পান, মাংস ভক্ষণ এবং মেদ, মজ্জা, অস্থি ও বসা আশ্বাদন পূর্ব্বক ইহা অতি উপাদেয়, ইহা অতি পবিত্র, ইহা অতি সুস্বাদু এই বলিয়া মহা আহ্লাদে নৃত্য করিতে আরম্ভ করিল। উহাদের মধ্যে কেহ কেহ বসাপানে পরিতৃপ্ত হইয়া ধাবমান হইল। ঐ সমুদায় মাংসজীবী দেখিতে অতি ভয়ানক। উহাদিগের বর্ণ পিঙ্গল, দন্ত পর্ব্বতাকার, কেশ জটিল, জজ্ঞা সুদীর্ঘ, উদর বৃহৎ, অঙ্গুলি পশ্চাৎভাগে নিহিত, কণ্ঠস্বর অতি ভয়ানক, শরীর ঘটাজালে জড়িত এবং কণ্ঠা নীলবর্ণ। উহারা নিতান্ত নিষ্ঠুর ও নির্ঘৃণ। উহাদের মধ্যে অনেকেরই পাঁচ চরণ। হে মহারাজ! এই রূপ নানা প্রকার বদনযুক্ত অতি বিকটাকার অর্কুদ অর্কুদ রাক্ষস তথায় সমুপস্থিত হইয়াছিল। ঐ সময় অসংখ্য ভূতও তাহাদের সহিত সন্মিলিত হইল।

অনন্তর প্রভাত্য সময়ে কুধিরাকুলেবর মহাবীর অশ্বখামা শিবির হইতে প্রতিগমন করিবার বাসনা করিলেন। ঐ সময় তাঁহার খজ্ঞানুষ্টি একবারে করতলে সংলগ্ন হইয়াছিল। তিনি অতি দুর্গম পথে পদার্পণ পূর্ব্বক প্রতিজ্ঞা প্রতিপালন করিয়া কল্যাণকাজী অনলের ন্যায় শোভা ধারণ করিয়াছিলেন। তৎকালে তাঁহার পিতৃবিনাশজনিত দুঃখ অন্তর্হিত হইয়াছিল। অনন্তর তিনি রজনীযোগে লোক সকল নিদ্রিত হইলে শিবিরে প্রবেশ পূর্ব্বক উহা যেকপ নিঃশব্দ দেখিয়াছিলেন, এক্ষণে তত্রত্য যাবতীয় লোক বিনষ্ট হওয়াতে উহা তদ্রূপ নিঃশব্দ দেখিয়া তথা হইতে নির্গত হইলেন এবং অচিরে কুপাচার্য্য ও কৃতবর্ম্মার সহিত মিলিত হইয়া তাঁহাদিগের হর্ষোৎপাদন পূর্ব্বক আদ্যোপায় সমস্ত কীর্ত্তন করি-

লেন। তখন তাঁহারাও আমরা অসংখ্য পাঞ্চাল ও সৃঞ্জয়কে উৎসন্ন করিয়াছি বলিয়া অশ্বখামার প্রীতি উৎপাদন করিতে লাগিলেন। অনন্তর তাঁহারা তিন জনই করতালি প্রদান পূর্বক মহা হর্ষধ্বনি করিতে আরম্ভ করিলেন।

হে মহারাজ ! এই রূপে সেই রজনী নিদ্রিত ও অনবহিত পাণ্ডবপক্ষীয় বীরগণের পক্ষে অতি ভয়ানক হইয়াছিল। কালের গতি অতিক্রম করা সুকঠিন। দেখুন, যাহারা আমাদের অসংখ্য বল নিহত করিয়াছিল, তাহারাই আবার এক্ষণে নিহত হইল। ধৃতরাষ্ট্র কহিলেন, হে সৃঞ্জয় ! মহারথ অশ্বখামা প্রতিনিয়তই আমার পুত্রের জয় লাভের নিমিত্ত যত্নবান ছিলেন। তিনি কি কারণে পূর্বেই একপ পরাক্রম প্রকাশ পূর্বক পাণ্ডবসৈন্য সংহারে প্রবৃত্ত হন নাই। এক্ষণে নীচাশয় দুৰ্য্যোধন নিপাতিত হইলেই বা তিনি কি কারণে ঐ কার্যের অনুষ্ঠান করিলেন, তাহা কীর্ত্তন কর।

সৃঞ্জয় কহিলেন, মহারাজ ! পূর্বে মহাবীর অশ্বখামা অসাধারণ ধীশক্তি সম্পন্ন বাসুদেব, সাত্যকি ও পাণ্ডবগণের ভয়ে ঐ কার্যের অনুষ্ঠান করিতে সমর্থ হন নাই। এক্ষণে তাঁহারা তথায় উপস্থিত না থাকাতে বিশেষত রাত্রিকালে সকলই নিঃশঙ্ক চিত্তে নিদ্রিত হওয়াতেই তিনি আপনার অভিলষিত কার্য্য সংসাধনে সমর্থ হইলেন। বাসুদেব ও সাত্যকি সমবেত পাণ্ডবগণের সমক্ষে অন্যের কথা দূরে থাকুক, দেবরাজ ইন্দ্র ও পাঞ্চাল ও সৃঞ্জয়গণকে বিনাশ করিতে পারেন না। এই রূপে মহাবীর অশ্বখামা, রূপাচার্য্য ও কৃতবর্মা পাণ্ডবসৈন্যগণকে বিনাশ পূর্বক পরস্পরের মুখাবলোকন করিয়া পরম সৌভাগ্য পরম সৌভাগ্য বলিয়া আহ্লাদ প্রকাশ করিতে লাগিলেন। অনন্তর মহাবীর দ্রোণ-তনয় মহা আহ্লাদে রূপাচার্য্য ও কৃতব-

র্মায়ে আলিঙ্গন করিয়া কহিলেন, আমি দ্রোপদীর পাঁচ পুত্র এবং হতাবশিষ্ট পাঞ্চাল, সোমক ও মৎস্যগণকে নিহত করিয়াছি। এক্ষণে আমরা কৃতকার্য্য হইলাম। অতএব আর বিলম্ব করিবার প্রয়োজন নাই। অচিরে কুরুরাজের সমীপে গমন পূর্বক যদি তিনি জীবিত থাকেন, তাহা হইলে তাঁহারে এই সকল বৃত্তান্ত নিবেদন করা কর্তব্য।

নবম অধ্যায় ।

হে মহারাজ ! এই রূপে সেই তিন মহারথ দ্রোপদীর পঞ্চ পুত্র ও পাঞ্চালগণকে বিনাশ করিয়া রণনিপতিত রাজা দুৰ্য্যোধনের নিকট আগমন ও রথ হইতে অবতরণ পূর্বক দেখিলেন কুরুরাজ বিচেতনপ্রায় হইয়া অনবরত রুধির বমন করিতেছেন এবং তাঁহার জীবন অতি অল্পমাত্র অবশিষ্ট আছে। বৃক প্রভৃতি ঘোরদর্শন স্বাপদগণ তাঁহারে ভক্ষণ করিবার অভিলাষে বেষ্টিত করিয়া রহিয়াছে। তিনি গাঢ়তর বেদনায় নিতান্ত কাতর ও ভূতলে বিলুপ্ত হইয়া অতি কষ্টে উহাদিগকে নিবারণ করিতেছেন। তদর্শনে সেই হতাবশিষ্ট বীরত্রয় নিতান্ত শোকাকুল হইয়া ঘন ঘন দীর্ঘ নিশ্বাস পরিত্যাগ পূর্বক তাঁহারে পরিবেষ্টিত করিলেন। কুরুরাজ সেই রুধিরোক্ষিত তিন মহারথ কর্তৃক পরিবেষ্টিত হইয়া ভ্রতানত্রয় পরিশোভিত যজ্ঞবেদীর ন্যায় অপূর্ব শোভা প্রাপ্ত হইলেন।

অনন্তর সেই বীরত্রয় কুরুরাজকে ধরাশয়ায় শয়ান দেখিয়া দুর্কিষহ দুঃখে অনর্গল অশ্রুজল বিসর্জন করিতে লাগিলেন এবং হস্ত দ্বারা দুৰ্য্যোধনের মুখমণ্ডল হইতে রুধিরধারা মোচন করিয়া বিলাপ ও পারিতাপ করত কহিলেন, হায় ! দৈবের অসাধ্য কিছুই নাই। কুরুরাজ দুৰ্য্যোধন একাদশ

অক্ষৌহিনীর অধিপতি ছিলেন, এক্ষণে উনি নিহত হইয়া রুধিরলিপ্ত কলেবরে ধরাতলে শয়ন করিয়া আছেন। এই গদাপ্রিয় মহাবীরের সমীপে সুবর্ণজালজড়িত ভীষণ গদা নিপতিত রহিয়াছে। ইনি কোন যুদ্ধেই গদা পরিত্যাগ করেন নাই। এক্ষণে প্রিয়তমা ভার্যা যেমন হস্ত্যতলে নিদ্রিত ভর্তার সহিত একত্র অবস্থান করে, তদ্রূপ এই গদা কুরুরাজের সহিত অবস্থান করিতেছে। উহা এই স্বর্গারোহণকালেও ইহঁারে পরিত্যাগ করিতেছে না। হায়! কালের কি বিচিত্র গতি! যিনি সমস্ত ভূপালগণের শ্রেষ্ঠ, আজি তিনি সমরে নিপতিত হইয়া রজোরশি গ্রাস করিতেছেন। যিনি বহুসংখ্য শত্রুকে নিহত করিয়া ভূতলশায়ী করিয়াছিলেন আজি তিনি বিপক্ষের বলবীর্য্যে বিনষ্ট হইয়া সমরাস্রমে শয়ন করিয়াছেন। অসংখ্য ভূপতি ভীত মনে যাঁহার চরণে প্রণত হইতেন, আজি তিনি সমরশায়ী হইয়া শৃগাল কুকুরে পরিবৃত্ত রহিয়াছেন। পূর্বে ব্রাহ্মগণ অর্থের নিমিত্ত যাঁহার নিকট সতত প্রার্থনা করিতেন, আজি মাংসাশী জন্তুগণ মাংস লাভার্থে সেই মহাবীরের উপাসনা করিতেছে।

অনন্তর মহারথ অশ্বখামা কুরুরাজকে সম্বোধন পূর্বক অতি করুণস্বরে বিলাপ ও পুরিতাপ করত কহিলেন, মহারাজ! লোকে তোমারে ধনুর্ধরাগ্রগণ্য বলিয়া নির্দেশ করিয়া থাকে। তুমি হনুধারী বলদেবের প্রিয় শিষ্য ও যুদ্ধে ধন্যধিপতি কুবেরের অনুরূপ। দুরাশ্রা ভীমরনস্থলে কিকপে তোমার রক্ত প্রাপ্ত হইল? কালকে অতিক্রম করা নিতান্ত সুকঠিন। ভীম তোমারে সংহার করিয়াছে ইহাও আমাদিগের দেখিতে হইল! সেই পাপাশ্রা মূর্খ ছলপ্রকাশ পূর্বক তোমার বিনাশে কৃতকার্য হইয়াছে। ঐ ছুরাচার ধর্ম্মযুদ্ধে তোমারে

আহ্বান করিয়া অধর্ম্মানুসারে গদাঘাতে তোমার উরুদ্বয় ভগ্ন করিয়াছে। সে যখন তোমারে অধর্ম্মযুদ্ধে নিপাতিত করিয়া তোমার মস্তকে পদাঘাত করে, তৎকালে কৃষ্ণ ও যুধিষ্ঠির তাহার প্রতি উপেক্ষা প্রদর্শন করিয়াছিল। অতএব তাহাদিগকে ধিক্। যত দিন এই জীবলোক বিদ্যমান থাকিবে, ততদিন রুকোদর যে শঠতাচরণ পূর্বক তোমারে সংহার করিয়াছে, সকলেই তাহার এই অপযশ ঘোষণা করিবে, সন্দেহ নাই। মহাবল বলদেব সর্বদা সভামধ্যে শ্লাঘা করিয়া থাকেন যে, কুরুরাজ দুর্গোদধন আমার নিকট গদাযুদ্ধ শিক্ষা করেন, তাঁহা অপেক্ষা গদাযুদ্ধে আর কেহই উৎকৃষ্ট নাই।

হে মহারাজ! মহর্ষিগণ ক্ষত্রিয়দিগের যাহা প্রশস্ত গতি বলিয়া কীর্তন করিয়া থাকেন, তুমি সমরে অপরাধুগ ও নিহত হইয়া সেই গতি লাভ করিলে। অতএব তোমার নিমিত্ত আমার কিছুমাত্র অনুতাপ হইতেছে না। কেবল তোমার রক্ত জনক জননী দারুণ পুত্রশোক প্রাপ্ত হইলেন বলিয়া আমি তাঁহাদিগের নিমিত্তই সন্তপ্ত হইতেছি। তাঁহারা অতঃপর ভিক্ষুক হইয়া শোকাকুলিত চিত্তে পৃথিবীতে পরিভ্রমণ করিবেন, সন্দেহ নাই। যত্নকুলোদ্ভব কৃষ্ণ ও দুর্মতি অর্জুনকে ধিক্! উহারা আপনাদিগকে ধার্ম্মিক বলিয়া অভিমান করে; কিন্তু তোমারে অধর্ম্মযুদ্ধে নিহত দেখিয়াও অন্যায়সে উপেক্ষা প্রদর্শন করিল! অন্যান্য ভূপালগণ দুর্গোদধন কিকপে নিহত হইয়াছেন এই কথা জিজ্ঞাসা করিলে নিলজ্জ পাণ্ডবগণ কি প্রত্যুত্তর প্রদান করিবে। হে কুরুরাজ! তুমি সমরে পরাধুগ না হইয়া যে ধর্ম্মযুদ্ধে প্রাণত্যাগ করিলে এই নিমিত্ত তোমারে অগণ্য ধন্যবাদ প্রদান করিতেছি। এক্ষণে বন্ধুবান্ধব বিহীন হতপুত্র।

গান্ধারী ও প্রজ্ঞাচক্ষু অন্ধরাজের কি গতি হইবে ! ভোজরাজ কৃতবর্মা, মহারথ রূপাচার্য্যকে ও আমারে ধিক্ । আমরা প্রজারক্ষক সর্বকামপ্রদ ভূপতিরে অগ্রসর করিয়া স্বর্গারোহণ করিতে পারিলাম না । পূর্বে আমরা মহাবীর রূপাচার্য্যের, আপনার ও আমার পিতার বীর্য্য প্রভাবে বন্ধু বান্ধব সমভিব্যাহারে রত্নময় বিবিধ গৃহে অবস্থান ও ভূরিদক্ষিণ প্রভূত যজ্ঞের অনুষ্ঠান করিয়াছি ; আমরা কাহার শরণাপন্ন হইব । আপনি সমুদায় ভূপতিরে অগ্রসর করিয়া পরলোকে যাত্রা করিলেন, কেবল আমরা তিন জন আপনার অনুগমন করিতে পারিলাম না । এই নিমিত্তই নিতান্ত তাপিত হইতেছি । এক্ষণে আমাদিগকে স্বর্গহীন অর্থবিহীন হইয়া চিরকাল আপনার স্মৃতি স্মরণ করিতে হইবে । আমরা জীবিত থাকিয়া আপনার কি হিতানুষ্ঠান করিব । এক্ষণে আপনি এই আশ্রিতগণকে পরিত্যাগ করাতে ইহাদের সুখ, শান্তি একবারেই উচ্ছিন্ন হইল । অতঃপর এই হতভাগ্যদিগকে অতিকষ্টে ভূনগুলে পর্য্যটন করিতে হইবে । হে মহারাজ ! আপনি স্বর্গারোহণ পূর্ব্বক আমার বচনানুসারে মহারথগণকে যথোপযুক্ত পূজা করিয়া সর্ব্বাগ্রে আমার পিতা ধনুর্ধ্বরাগ্রগন্য আচার্য্যকে কহিবেন যে, আজি অশ্বখামা দুরাশ্রয় ঋতুমকে নিপাতিত করিয়াছে । পিতারে এই কথা বলিয়া মহারথ বাহুলীক, সিন্ধুরাজ, সোমদত্ত, ভূরিশ্রবা ও অন্যান্য ভূপালগণকে আলিঙ্গন পূর্ব্বক তাঁহাদিগের কুশল জিজ্ঞাসা করিবেন ।

হে মহারাজ ! মহাবীর অশ্বখামা ভগ্নোদ্ধার বিচ্যেতন দুর্য্যোধনকে এই কথা কহিয়া পুনরায় তাঁহারে নিরীক্ষণ পূর্ব্বক কহিলেন, কুরুরাজ ! যদি জীবিত থাকেন, তবে এই শ্রুতিসুখকর বাক্য শ্রবণ করুন । এক্ষণে

পাণ্ডবপক্ষে পঞ্চপাণ্ডব, বাসুদেব ও সাত্যকি এই সাতজন এবং আমাদের পক্ষে আমরা তিন জন, সমুদায়ে উভয় পক্ষে আমরা দশজনমাত্র জীবিত রহিয়াছি । দ্রৌপদীর পাঁচ পুত্র, ঋতুমকের পুত্র সমুদায়, পাঞ্চালগণ ও অবশিষ্ট মৎস্যগণ আমার হস্তে নিহত হইয়াছে । আমি এই রাত্রিযোগে শিবিরে প্রবেশ পূর্ব্বক পাণ্ডব ঋতুমকে পশুর ন্যায় সংহার ও পাণ্ডবগণের সমুদায় বাহন, সৈন্য ও পুত্রগণকে বিনাশ পূর্ব্বক বৈরনির্ঘাতন করিয়াছি । হে মহারাজ ! কুরুরাজ দুর্য্যোধন দ্রোণপুত্রের মুখে সেই প্রীতিকর সমাচার শ্রবণে সংজ্ঞা লাভ করিয়া কহিলেন, হে বীর ! মহাবাহু ভীষ্মদেব, কর্ণ ও তোমার পিতা দ্রোণাচার্য্য যে কার্য্য সংসাধনে অসমর্থ হইয়াছিলেন, তুমি কৃতবর্মা ও রূপাচার্য্যের সহিত মিলিত হইয়া তাহা সম্পাদন করিয়াছ । নীচাশ্রয় পাণ্ডব সেনাপতি ঋতুমক শিখণ্ডীর সহিত নিহত হইয়াছে শ্রবণ করিয়া আজি আমি আপনারে ইন্দ্রভুল্য জ্ঞান করিতেছি ; এক্ষণে তোমাদিগের মঙ্গল হউক ; পুনরায় স্বর্গে আমার সহিত মিলন হইবে । কুরুরাজ এই কথা বলিয়া সেই বীরত্বকে আলিঙ্গন পূর্ব্বক প্রাণ পরিত্যাগ করিয়া বন্ধুবিরোগ দুখে বিস্মৃত হইয়া স্বর্গে সমাক্রান্ত হইলেন । তাঁহার দেহমাত্র ভূতলে নিপতিত রহিল । হে মহারাজ ! এই রূপে কুরুপতি মহাবীর দুর্য্যোধন সমরে ঘোরতর পরাক্রম প্রকাশ পূর্ব্বক শত্রুহস্তে কলেবর পরিত্যাগ করিলেন । অনন্তর সেই বীরত্ব কুরুরাজকে আলিঙ্গন ও সন্মোহনয়নে বারংবার নিরীক্ষণ করিয়া স্ব স্ব রথে আরোহণ পূর্ব্বক শোকসন্তপ্ত চিত্তে সেই প্রত্যাব সময়ে নগরাভিমুখে ধাবমান হইলেন । মহারাজ ! আপনার কুমন্ত্রণাই এই কুরুপাণ্ডব সৈন্যক্ষয়ের মূলভূত কারণ । আজি আপনার পুত্র

স্বর্গারোহণ করিলে আমার ঋষিপ্রদত্ত দিব্য-
দর্শিত্ব বিনষ্ট হইয়াছে ।

বৈশম্পায়ন কহিলেন, মহারাজ ! রাজা
বৃতরাষ্ট্র এই রূপে প্রিয় পুত্র দুর্যোধনের
নিধনবাস্তা শ্রবণ করিয়া দীর্ঘ নিশ্বাস
পরিত্যাগ পূর্বক নিতান্ত চিন্তাকুল হই-
লেন ।

ঐষীক পরাধ্যায় ।

দশম অধ্যায় ।

বৈশম্পায়ন কহিলেন, মহারাজ ! এ
দিকে রজনী প্রভাত হইবামাত্র বৃষ্টিদ্রুমের
সারথি ধর্ম্মরাজ যুধিষ্ঠিরের সমীপে সমুপ-
স্থিত হইয়া ঐ রাত্রির সমুদায় বৃত্তান্ত বর্ণন
করত কহিল, মহারাজ ! ভ্রূপদতনয়গণ ও
দ্রৌপদীর পাঁচ পুত্র রাত্রিকালে বিশ্ব-
স্ত চিত্তে শিবিরमध्ये নিদ্রিত ছিলেন,
দুরাশ্র ক্রোধাচার্য্য, কৃতবর্মা ও অশ্বখামা
সেই সুযোগে তাঁহাদিগকে বিনাশ করি-
য়াছে । ঐ দুরাশ্রাদিগের প্রাণ, শক্তি ও
পরশু প্রভাবে আমাদের অসংখ্য হস্তী, অশ্ব
ও মনুষ্য এককালে নিঃশেষিত হইয়াছে ।
কুঠারনিকৃত মহাবনের ন্যায় আপনার
বিপুল বল বিনষ্ট হইতে আরম্ভ হইলে
ভীষণ ভূমূল শব্দ শ্রুতিগোচর হইয়াছিল ।
দুরাশ্রা আপনার শিবিরস্থ সমুদায় প্রাণীর
প্রাণ সংহার করিয়াছে, কেবল আমি একা-
কী অনবহিত কৃতবর্ম্মার হস্ত হইতে অতি
কষ্টে মুক্তি লাভ করিয়াছি ।

হে জনমেজয় ! কুন্তীতনয় যুধিষ্ঠির দূত-
মুখে সেই অমঙ্গল বাক্য শ্রবণ করিবামাত্র
পুত্রশোকে নিতান্ত কাতর হইয়া ভূতলে নিপ-
তিত হইলেন । মহাবীর সাত্যকি, ভীমসেন,
অর্জুন, নকুল ও সহদেব তৎক্ষণাৎ তাঁহাকে
ধারণ করিলেন । তখন ধর্ম্মরাজ অতিকষ্টে

সংজ্ঞা লাভ করিয়া শোকাকুল বাক্যে বিলাপ
করত কহিতে লাগিলেন, হায় ! আমরা যে
শক্রগণকে পরাজয় করিলাম, আবার তাহা-
দিগের হস্তেই আমরা দিগকে পরাজিত হইতে
হইল । কার্য্যগতি দিব্যজ্ঞানসম্পন্ন ব্যক্তি-
গণ নিতান্ত দুর্জের । আমরা বিপক্ষগণের
গুরু, ভ্রাতা, পুত্র, পৌত্র, বন্ধু, বয়স্য ও
অমাত্য প্রভৃতি সকলকে পরাজয় ও বিনাশ
করিয়া পরিশেষে পরাজিত হইলাম । দৈব
প্রভাবে অনর্থ অর্থের ন্যায় এবং অর্থ অন-
র্থের ন্যায় বোধ হইয়া থাকে । এক্ষণে
আমাদিগের এই জয়লাভ পরাজয় তুল্য
এবং বিপক্ষদিগের পরাজয় জয়ের তুল্য
হইয়াছে । যে জয় দ্বারা বিপদগ্রস্তের ন্যায়
অনুতাপ করিতে হয়, সে জয় কখনই জয়
নহে ; উহা পরাজয় স্বরূপ । হায় ! আমরা
যাহাদিগের নিমিত্ত বন্ধু বান্ধব বিনাশ
করিয়া পাপাচরণ করিলাম, নির্জিত ব্যক্তি-
গণ আবার সেই জয়লাভপ্ররূপ পুত্রগণ-
কেই বিনষ্ট করিল । দেখ, কণি ও নালীক
যাহার দংষ্ট্রা, খড়্গ যাহার জিহ্বা, কার্মুক
যাহার ব্যাদিত বদন ও জ্যানিস্বন যাহার
গর্জন স্বরূপ প্রতীকমান হইত, সেই সিংহ
স্বরূপ সমরোৎসাহী ক্রোধাবিষ্ট কর্ণের হস্ত
হইতে যাহারা পুরিত্রাণ লাভ করিয়াছিল,
তাহারাই আজি প্রমাদ বশত নিহত হইল ।
যাহারা বায়ুবেগগামী তুরঙ্গ সংযোজিত
রথে সমাক্রান্ত বিচিত্র শরশরাসন সম্পন্ন
সমরদুর্ম্মদ দ্রোণাচার্য্যের নিকট মুক্তি লাভ
করিয়াছিল, আজি সেই রাজপুত্রগণই প্রমাদ
প্রযুক্ত কালকবলে প্রবেশ করিল ! অতএব
মর্ত্যলোকে প্রমাদই মনুষ্যের নিধনের প্র-
ধান কারণ । অনবহিত ব্যক্তি অচিরে
অর্থভ্রষ্ট ও অনর্থগ্রস্ত হয় এবং কদাচ
বিদ্যা, তপস্যা, শ্রী ও কীর্ত্তিলাভে সমর্থ
হয় না । দেখ, দেবরাজ ইদং অবহিত হইয়াই
সমস্ত শত্রু বিনাশ পূর্বক সুখে ইন্দ্র

ভোগ করিতেছেন। সমৃদ্ধি সম্পন্ন বণিকেরা যেমন সাবধানে সমুদ্র সমুত্তীর্ণ হইয়া পরিশেষে প্রমাদ প্রযুক্ত সামান্য নদী-মধ্যে নিমগ্ন হয়, তদ্রূপ শিবিরস্থ রাজবংশীয় মহেন্দ্র তুল্য বীরগণ মহারথদিগের হস্ত হইতে বিমুক্ত হইয়া অনবধান বশত ক্ষুদ্র অরাতিহস্তে নিহত হইল। তাহারা নিদ্রিতাবস্থায় শত্রুহস্তে নিহত হইয়া স্বর্গলোকে গমন করিয়াছে, সন্দেহ নাই। হায়! এক্ষণে প্রিয়তমা দ্রৌপদী রুদ্ধ পিতা এবং ভ্রাতা ও পুত্রগণের নিধনবার্তা শ্রবণ করিবামাত্র জ্ঞানশূন্য ও ভূতলে নিপতিত হইয়া শোকানলে দগ্ধ হইবে। হায়! আজি তাহার কি দুর্দশা উপস্থিত হইল।

রাজা যুধিষ্ঠির এই রূপ বিলাপ করিয়া নকুলকে কহিলেন, মাদ্রীতনয়! তুমি অবিলম্বে মন্দভাগিনী দ্রৌপদীকে তাহার মাতৃকুলের সহিত এই স্থানে উপনীত কর। তখন ধর্ম্মাশ্রম নকুল যুধিষ্ঠিরের বচনানুসারে রথারোহণ পূর্বক দেবী পাঞ্চালী ও পাঞ্চলরাজের মন্দিরগণকে আনয়নার্থ প্রস্থান করিলেন। মাদ্রীতনয় প্রস্থান করিলে রাজা যুধিষ্ঠির শোকাক্রান্ত চিত্তে সুহৃদগণ সমভিব্যাহারে রোদন করিতে করিতে সেই ভূতগণ সমাকীর্ণ শিবিরমধ্যে প্রবেশ করিয়া দেখিলেন, তাহার পুত্রগণ ও বন্ধু বান্ধব সমুদায় রুদ্ধকলেবরে ভূতলে শয়ান রহিয়াছে। তাহাদিগের দেহ ছিন্ন ভিন্ন এবং কলেবর হইতে মস্তক পৃথক্কৃত হইয়াছে। ধর্ম্মরাজ তাহাদের সেই দুর্বস্থা দর্শনে যাহার পর নাই দুঃখিত হইয়া উচ্চ স্বরে রোদন করিতে করিতে অচেতন ও অনুচরগণের সহিত ভূতলে নিপতিত হইলেন।

একাদশ অধ্যায়।

হে মহারাজ! ধর্ম্মরাজ যুধিষ্ঠির এই রূপে পুত্র পৌত্র ও সুহৃদগণকে সমরে

নিহত দেখিয়া শোক দুঃখে নিতান্ত অভিভূত হইলেন। তাহাদের রূপলাবণ্য ও গুণগ্রাম স্মরণে তাহার শোকসাগর এককালে উচ্ছলিত হইয়া উঠিল। তখন তত্রত্য সুহৃদগণ নিতান্ত দুঃখিত হইয়া অশ্রুপূর্ণনেত্র কল্পিতকলেবর বিচেতনপ্রায় ধর্ম্মরাজকে বিবিধ প্রকারে সান্ত্বনা করিতে লাগিলেন। ঐ সময়ে মহাত্মা নকুল রোহিত্যমানা দ্রৌপদীর সহিত সূর্য্য সদৃশ সমুজ্জ্বল রথে আকূট হইয়া তথায় আগমন করিলেন। কমলনয়না পাঞ্চালী শিবির সন্নিধানে পুত্রগণের নিধন বৃত্তান্ত শ্রবণমাত্র বায়ুতাড়িত কদলীর ন্যায় বিকল্পিত কলেবরে শোকাকুলিত চিত্তে রাজা যুধিষ্ঠিরের নিকটে আগমন পূর্বক সহসা ধরাতে নিপতিত হইলেন। তাহার মুখকমল তিমিরারূত সূর্য্যের ন্যায় মলিন হইয়া গেল। ক্রোধপরায়ণ রুকোদর প্রিয়তমারে ধূলিধূসরিত দেখিয়া বাহু প্রসারণ পূর্বক ধারণ করিয়া সান্ত্বনা করিতে লাগিলেন। পুত্রশোকাক্রান্ত দ্রৌপদী ভীমসেনকর্তৃক আশ্বাসিত হইয়া অন্যান্য পাণ্ডবগণ সমক্ষে ধর্ম্মরাজকে কহিলেন, মহারাজ! আপনি ক্ষত্রধর্ম্মানুসারে পুত্রগণকে কালকবলে নিক্ষেপ করিয়া কি সুখে রাজ্য সন্তোষ করিবেন? সমুদায় পৃথিবীর অধীশ্বর হইয়াই কি একবারে মত্তমাতঙ্গগামী সুভদ্রাতনয় অভিমন্যুকে বিস্মৃত হইলেন? আপনি শিবিরমধ্যে বীরবরাগ্রগণ্য পুত্রগণের নিধনবৃত্তান্ত শ্রবণ করিয়া কি রূপে সুস্থির রহিয়াছেন? পাপপরায়ণ নৃশংস অশ্বখামা সুখপ্রসুপ্ত বীরগণকে নিহত করিয়াছে শ্রবণ করিয়া আমার হৃদয় শোকানলে দগ্ধ হইতেছে। যদি আপনি আজি সেই পামরের জীবন সংহার না করেন, তাহা হইলে আমি নিশ্চয়ই এই স্থানে প্রায়োপবেশন করিব। অতএব অবিলম্বে দুরাত্মা দ্রোণতনয়কে উপযুক্ত প্রতিকূল প্রদান

করুন। যশস্বিনী কুমারী এই বলিয়া ধর্মরাজের সমীপে প্রায়োপবেশন করিলেন।

পরম ধার্মিক রাজা যুধিষ্ঠির প্রিয় মহিষী পাঞ্চালীকে প্রায়োপবিষ্ট দেখিয়া কহিলেন, যাজ্ঞসেনি! তুমি ধর্মের মর্ম অবগত আছ। তোমার পুত্র ও ভ্রাতৃগণ ধর্মযুদ্ধে নিহত হইয়াছে; অতএব তাহাদের নিমিত্ত আর অনুতাপ করিও না। আর দ্রোণপুত্রও এ স্থান হইতে অতি দূরবর্তী দুর্গম অরণ্যে পলায়ন করিয়াছে; অতএব তুমি কি রূপে তাহার সমরমৃত্যু অবগত হইতে সমর্থ হইবে?

দ্রৌপদী কহিলেন, মহারাজ! শুনিয়াছি, দ্রোণপুত্রের মস্তকে একটি মহাজ্ঞ মণি আছে, যদি আপনি ঐ পাপাত্মারে নিপাতিত করিয়া তাহার সেই মণি আহরণ করেন, তাহা হইলে উহা আপনার মস্তকে রাখিয়া আমি কথঞ্চিৎ জীবন ধারণ করিতে পারি। চাকু-দর্শনা যাজ্ঞসেনী ধর্মরাজকে এই কথা কহিয়া ভীমসেনের নিকট আগমন পূর্বক কাতর স্বরে কহিলেন, হে নাথ! ক্ষত্রধর্ম স্মরণ করিয়া আমাদের পুরিত্রাণ করা তো-মার অবশ্য কর্তব্য; অতএব সুররাজ যেমন শত্রুরকে নিহত করিয়াছিলেন, তদ্রূপ তুমি পাপাত্মা অশ্বখামারে নিপাতিত কর। ইহ-লোকে তোমার তুল্য পরাক্রান্ত পুরুষ আর কে আছে? তুমি যে বারণাসবত নগরে বিবম বিপন্ন পাণ্ডবগণের একমাত্র আশ্রয় হইয়া-ছিলে; হিড়িম্ব নিশাচরের হস্ত হইতে যে ভ্রাতৃগণ ও মাতাকে রক্ষা করিয়াছিলে, তাহা কাহারও অবিদিত নাই। আর সুররাজ পুরন্দর যেমন নভ্বের হস্ত হইতে শট্টারে পুরিত্রাণ করিয়াছিলেন, তদ্রূপ তুমি বিরাট নগরে দুরাগ্রা কীচকের হস্ত হইতে আমাদের পুরিত্রাণ করিয়াছ। হে বীর! তুমি পূর্বে যেমন এই সকল মহৎ কার্য সাধন করিয়া-ছিলে, তদ্রূপ এক্ষণে দুরাগ্রা অশ্বখামারে সংহার করিয়া সুস্থশরীর হও।

হে মহারাজ! পুত্রশোকাক্ত পাঞ্চালী এই রূপ বিলাপ করিলে মহাবীর রুকোদর উহা সহ্য করিতে না পারিয়া কান্দু কহন্তে কাঞ্চন-ভূষিত মহারথে আরোহণ পূর্বক নকুলকে সারথ্য কার্যে নিযুক্ত করিয়া দ্রোণপুত্রের বি-নাশ বাসনায় সশর শরাসন বিস্ফারণ করিতে লাগিলেন। তাহার অশ্বগণ নকুল কর্তৃক পরিচালিত হইয়া বায়ুবেগে ধাবমান হইল। এই রূপে ভীমপরাক্রম ভীমসেন শিবির হইতে বহির্গত হইয়া দ্রোণপুত্রের রথচক্র-চিহ্ন দর্শন পূর্বক সেই চিহ্নের অনুসরণ ক্রমে তাহার অভিযুখে গমন করিতে লাগি-লেন।

দ্বাদশ অধ্যায় ।

হে মহারাজ! সমরদুর্কর্ম মহাবীর ভীম-সেন অশ্বখামার নিধনার্থ ধাবমান হইলে বহুকুলতিলক বাসুদেব যুধিষ্ঠিরকে কহি-লেন, মহারাজ! আপনার ভ্রাতা ভীমসেন পুত্রশোকসন্তপ্ত হইয়া একাকীই অশ্বখামার বিনাশ বাসনায় গমন করিতেছেন। অন্যান্য ভ্রাতৃগণ অপেক্ষা ভীমসেন আপনার সমধিক প্রিয়। আপনি আজি তাহারে বিপদসাগরে পতনোন্মুখ দেখিয়া কি রূপে নিশ্চিন্ত রহি-লেন। ধনুর্দ্বারা গুণ্য মহাত্মা দ্রোণাচার্য্য স্বীয় পুত্রকে ব্রহ্মশির নামে যে অস্ত্র প্রদান করিয়াছেন, উহা সমুদায় পৃথিবী দধ্ব করিতে সমর্থ। আচার্য্য প্রথমে ঐ অস্ত্র প্রিয় শিষ্য অর্জুনকে প্রদান করাতে তাহার একমাত্র পুত্র অশ্বখামা কোপাবিষ্ট হইয়া পিতার নিকট ঐ অস্ত্র প্রার্থনা করেন। সর্বধর্মবি-শারদ দ্রোণাচার্য্য পুত্রকে দুঃশীল ও চঞ্চল বলিয়া পরিজ্ঞাত ছিলেন, তন্নিমিত্ত অনাতি-সম্বৃত্ত চিত্তে তাহারে সেই অস্ত্র প্রদান পূর্বক কহিলেন, বৎস! ঘোরতর বিপদকালেও কাহারও বিশেষত মনুষ্যের প্রতি এই অস্ত্র পরিত্যাগ করিও না। আচার্য্য পুত্রকে এই

রূপে অস্ত্র ও উপদেশ প্রদান পূর্বক পুন-
রায় কহিলেন, পুত্র! তুমি কখনই সাধু
জনশ্রুত পথে অবস্থান করিতে পারিবে
না। তখন অশ্বখামা পিতার সেই অপ্রিয়
বাক্য শ্রবণে এককালে মঙ্গল লাভে হতাস্থাস
হইয়া শোকাকুলিত চিত্তে পৃথিবী পর্যটন
করিতে লাগিলেন। হে ধর্মরাজ! আপনি
যৎকালে বনবাসী হইয়াছিলেন, সেই সময়
দ্রোণপুত্র দ্বারকায় আগমন পূর্বক কিয়-
দ্দিন তথায় অবস্থান করেন। বৃষ্ণিবংশীয়
বীরগণ তাঁহারে প্রতিনিয়ত পূজা করি-
তেন। এক দিন আমি একাকী অবস্থান
করিতেছি, এমন সময়ে দ্রোণকুমার আমার
নিকটে সমুপস্থিত হইয়া কহিলেন, বাসুদেব!
আমার পিতা অতি কঠোর তপস্যা করিয়া
মহর্ষি অগস্ত্যের নিকটে ব্রহ্মর্ষির নামে যে
দেবগন্ধর্বপুঞ্জিত অস্ত্র লাভ করিয়াছি-
লেন, এক্ষণে আমার নিকটে সেই অস্ত্র বিদ্য-
মান আছে। আপনি উহা গ্রহণ করিয়া
আমারে আপনার অরাতিঘাতন চক্র প্রদান
করুন। অশ্বখামা এই রূপে অস্ত্র প্রার্থনা
পূর্বক কৃতাজ্জলপুটে বিবিধ অনুন্নয় বিনয়
করিলে আমি প্রীত হইয়া কহিলাম, ব্রহ্মন!
দেব, দানব, গন্ধর্ব, মনুষ্য, উরগ ও পতঙ্গগণ
একত্র মিলিত হইলে বলবীৰ্য্যে আমার
শতাংশের একাংশও হইবে না। অতএব
তোমার অস্ত্রে আমার প্রয়োজন নাই।
আমার এই শরাসন, শক্তি, চক্র ও গদা
বিদ্যমান আছে। এই সমস্ত অস্ত্রের মধ্যে
যাহা তুমি সমরে প্রয়োগ করিতে সমর্থ
হইবে, তাহা প্রার্থনা কর; আমি অবশ্যই
তোমারে প্রদান করিব। দ্রোণপুত্র আমার
বাক্য শ্রবণে গর্ব পূর্বক এই বজ্রতুলা
লৌহময় সহস্র কোটি সম্পন্ন চক্র প্রার্থনা
করিল। আমিও তাঁহারে অচিরে চক্র
গ্রহণ করিতে অনুজ্ঞা করিলাম। তখন
দ্রোণকুমার সহসা উৎখিত হইয়া বাম হস্তে

চক্র ধারণ করিলেন, কিন্তু কোন ক্রমেই
স্থানান্তরিত করিতে পারিলেন না। তৎপরে
তিনি উহা দক্ষিণ করে ধারণ করিলেন,
কিন্তু তাহাতেও কৃতকার্য হইলেন না।
পরিশেষে তিনি সম্পূর্ণ আয়াস ও যত্ন সহ-
কারে কোন ক্রমে চক্র সঞ্চালিত করিতে
না পারিয়া ক্ষুণ্ণিত মনে চক্র গ্রহণ প্রত্যাশা
পরিত্যাগ করিলেন। তখন আমি তাঁহারে
নিতান্ত উদ্ভিষ্ট দেখিয়া কহিলাম, আচার্য্যপুত্র!
যে মহাবীর সমুদায় মনুষ্য অপেক্ষা শ্রেষ্ঠ,
যে সাক্ষাৎ দেবাদিদেব মহাদেবকে দ্বন্দ্ব-
যুদ্ধে পরিতুষ্ট করিয়াছে, পৃথিবী মধ্যে
যাহার তুল্য প্রিয় পাত্র আমার আর কেহই
নাই, আমি যাহারে পুত্র বলত্র প্রভৃতি
সমুদায়ই প্রদান করিতে পারি, সেই পরম
সুহৃৎ শ্বেতাস্ব কপিধ্বজ অর্জুন কদাপি এই
চক্র প্রার্থনা করে নাই। আমি হিমালয়ের
পার্শ্বে দ্বাদশ বৎসর কঠোর ব্রহ্মচর্য্য অনুষ্ঠান
করিয়া যাহারে পুত্রত্বে লাভ করিয়াছি, যে
বীর আমার তুল্য ব্রতচারিণী কুক্লেণীর গর্ভে
সনৎকুমারের অংশে জন্ম গ্রহণ করিয়াছে,
সেই প্রিয় পুত্র প্রত্নামও কখন এই দিব্য
চক্র প্রার্থনা করে নাই। আর মহাবল
পরাক্রান্ত বলদেব, গদ ও শাস্ত্র প্রভৃতি দ্বার-
কানিবাসী বৃষ্ণিবংশীয় মহারথগণও কখন
এই চক্র গ্রহণ করিবার বাসনা করেন নাই।
তুমি কোন সাহসে ইহা প্রার্থনা করিলে?
তোমার পিতা ভরতবংশীয়দিগের আচার্য্য,
তুমিও সমুদায় যাদবগণের মান্য। অতএব
একপ গর্হিত প্রার্থনায় প্রবৃত্ত হওয়া তো-
মার নিতান্ত অকর্তব্য হইয়াছে। যাহা
হউক, এক্ষণে এই চক্র লইয়া কাহার সহিত
সংগ্রাম করিতে বাসনা করিয়াছিলে?

তখন দ্রোণপুত্র কহিলেন, হে প্রভো!
আমি আপনাকে পূজা করিয়া আপনারই
সহিত সংগ্রামে প্রবৃত্ত হইয়া সর্বভূতের অপ-
রাধের হইব এই অভিপ্রায়ে এই দেবদানব

পূজিত চক্র প্রার্থনা করিয়াছিলাম । যাহা হউক, এক্ষণে আপনি অনুমতি করুন, আমি চক্র লাভে কৃতকার্য না হইয়াও শিবের সহিত যুদ্ধে গমন করি । তুমি এই যে ভীষণ চক্র ধারণ করিয়াছ, ইহা আর কাহারও ধারণ করিবার ক্ষমতা নাই । মহাবীর অশ্বখামা এই বলিয়া রথ, অশ্ব ও বিবিধ ধনরত্ন গ্রহণ পূর্বক যথাসময়ে তথা হইতে প্রস্থান করিলেন । হে মহারাজ ! ঐ মহাবীর নিতান্ত রোষপরায়ণ ও বিশেষত ব্রহ্মশির অস্ত্র অবগত আছেন ; অতএব এক্ষণে তাঁহার হস্ত হইতে বৃকোদরকে রক্ষা করা অবশ্য কর্তব্য ।

ত্রয়োদশ অধ্যায় ।

হে জনমেজয় ! ধনুর্ধরাগ্রগণ্য যত্নন্দন বাসুদেব যুধিষ্ঠিরকে এই কথা কহিয়া সর্বা-যুধ সম্পন্ন সূর্যাসঙ্কাশ রথে আরোহণ করিলেন । ঐ রথের ধুরকাঠের দক্ষিণে শৈব্য, বামে সুগ্রীব এবং উহার উভয় পার্শ্বে মেঘপুষ্প ও বলাহক নামে কায়োজ দেশীয় সুবর্ণমালাভূষিত অশ্ব সংযোজিত ছিল । উহাতে বিশ্বকর্মানির্মিত রত্নখচিত দিব্য ধ্বজযষ্টি মূর্তিমতী মায়ার ন্যায় লক্ষিত হইতে লাগিল । ঐ ধ্বজদণ্ডে প্রতাপুজো-দ্ভাসিত পতঙ্গরাজ গরুড় অবস্থান করাতে উহার অপূর্ব শোভা হইয়াছিল । অনন্তর ধর্মরাজ যুধিষ্ঠির ও অর্জুন সেই গরুড়ধ্বজ রথে আরোহণ ও বাসুদেবের উভয় পার্শ্বে অবস্থান পূর্বক দেবরাজ ইন্দ্রের উভয় পার্শ্ব-বর্তী অশ্বিনীকুমারদ্বয়ের ন্যায় সুশোভিত হইলেন । তখন মহামতি বাসুদেব অশ্বপৃষ্ঠে কষাঘাত করিলে অশ্বগণ মহাবেগে বাবনান হইল । বিহঙ্গকুলের গমন কালে নভোম-ণ্ডলে যেকপ শব্দ হইয়া থাকে, অশ্বগণের গমনবেগে অবনিমণ্ডলে সেই রূপ ঘোর-তর শব্দ হইতে লাগিল । উহারা কিয়ৎক্ষণ মধ্যে ভীমের সন্নিহিত হইল । তখন বাসু-

দেবপ্রমুখ বীরত্রয় শত্রুবিনাশে সমুদ্যত ক্রো-ধোদ্ধত মহাবীর বৃকোদরকে নিবারণ করিতে লাগিলেন, কিন্তু তদ্বিষয়ে কিছুতেই কৃত-কার্য হইতে পারিলেন না । মহাবল পরা-ক্রান্ত ভীমসেন তাঁহাদের বাক্যে অনাদর প্র-কাশ পূর্বক দ্রোণদীতনয়নিহস্তা দ্রোণাশ্রজ অশ্বখামারে লক্ষ্য করিয়া ভাগীরথীতীরে সমুপস্থিত হইয়া দেখিলেন, মহর্ষি কৃষ্ণ দ্বৈ-পায়ন অন্যান্য ঋষিগণের সহিত তথায় অবস্থান করিতেছেন এবং ক্রুরকর্মা অশ্ব-খামা ঘটাক্ত, কুশচীরধারী ও ধূলিপটল পরিবৃত্ত হইয়া তাঁহারই সন্নিধানে উপবিষ্ট আছেন । তখন মহাবীর ভীম দ্রোণপুত্রকে দেখিবামাত্র ক্রোধভরে শর শরাসন গ্রহণ পূর্বক থাক্ থাক্ বলিয়া তাঁহার প্রতি-ধাবমান হইলেন । মহারথ অশ্বখামা ভীম-বল ভীমসেনকে মহাবেগে আগমন ও তাঁহার ভ্রাতৃত্বকে তাঁহারই পশ্চাদ্ভাগে বাসুদেবের রথে অবস্থান করিতে দেখিয়া অতিশয় ব্যথিত হইলেন এবং পুনরায় যুদ্ধ উপস্থিত হইল অনুমান করিয়া সেই বিপদ-কালে দিব্যাস্ত্র প্রয়োগ করিবার মানসে ঈষিকা গ্রহণ করিলেন । তৎপরে তিনি ক্রো-ধভরে সেই ঈষিকায় ব্রহ্মশির অস্ত্র সংযো-জন পূর্বক পাণ্ডববংশ বিনষ্ট হউক বলিয়া উহা পরিত্যাগ করিলেন । সেই দিব্যাস্ত্র পরিত্যক্ত হইবামাত্র ত্রিলোক দগ্ধ করিবার নিমিত্তই যেন উহাতে জ্বাশন, প্রাচুর্ভূত হইল ।

চতুর্দশ অধ্যায় ।

হে মহারাজ ! মহাবাহু মধুসূদন অশ্ব-খামার আকার দর্শনে তাঁহার অভিপ্রায় বুঝিতে পারিয়া বনজয়কে কহিলেন, সখে ! তোমার নিকট যে দ্রোণোপদ্রষ্ট দিব্যাস্ত্র বিদ্যমান রহিয়াছে, এক্ষণে ঐ অস্ত্র ত্যাগের সময় সমুপস্থিত হইয়াছে । তুমি ভ্রাতৃগণ

ও আপনার পরিত্রাণার্থ সেই অস্ত্র পরিত্যাগ করিয়া অশ্বখামার অস্ত্র নিবারণ কর। তখন অরাতিনিপাতন অর্জুনের বাসুদেবের বাক্য শ্রবণ করিয়া সশর শরাসন গ্রহণ পূর্বক রথ হইতে অবতীর্ণ হইলেন এবং সর্বাঙ্গে অশ্বখামার ও তৎপরে আপনার ও ভ্রাতৃগণের নিমিত্ত স্বস্তিবাচন এবং গুরু ও দেবগণকে নমস্কার পূর্বক এই অস্ত্র-প্রভাবে অশ্বখামার অস্ত্র নিরাকৃত হইক বলিয়া সেই দিব্যাস্ত্র পরিত্যাগ করিলেন। তখন দ্রোণপুত্রের ও অর্জুনের সেই তেজো-মণ্ডলমণ্ডিত অস্ত্রদ্বয় সহসা যুগান্তকালীন অনলের ন্যায় প্রজ্জ্বলিত হইয়া উঠিল। ঐ সময় সহস্র সহস্র উল্কাপাত হইতে লাগিল; সমুদায় জীবজন্তু ভয়ে কম্পিত হইল। আকাশমণ্ডলে ভীষণ শব্দ ও বিদ্যুৎপাত হইতে লাগিল এবং গিরিকানন পরিপূর্ণা সমাগরা ধরিত্রী কম্পিত হইয়া উঠিল।

অনন্তর সর্বভূতাত্মা নারদ ও ভরতকুল পিতামহ ব্যাসদেব সেই দিব্যাস্ত্রদ্বয়ের তেজঃ-প্রভাবে সমুদায় লোককে তাপিত দেখিয়া অশ্বখামা ও ধনঞ্জয়কে সান্ত্বনা ও তাঁহাদের অস্ত্রতেজ নিবারণ করিবার মানসে সেই প্রদীপ্ত দিব্য অস্ত্রদ্বয়ের মধ্যস্থলে অবস্থান পূর্বক প্রজ্জ্বলিত পাবকদ্বয়ের ন্যায় শোভা পাইতে লাগিলেন এবং কহিলেন, পূর্বে অনেক বিবিধাস্ত্রবেত্তা মহারথ ছিলেন; তাঁহারা মনুষ্যের উপর কদাপি একপ অস্ত্র পরিত্যাগ করেন নাই। এক্ষণে ইহারা দুই জনে এই অস্ত্র প্রয়োগ করিয়া নিতান্ত সাহস প্রকাশ করিয়াছেন।

পঞ্চদশ অধ্যায়।

হে মহারাজ! তখন মহাবীর ধনঞ্জয় সেই ছত্ৰাশন সূর্য তেজঃপুঞ্জকলেবর তাপসদ্বয়কে দর্শন করিবামাত্র অতিমাত্র ব্যগ্র চিত্তে স্বীয় দিব্যাস্ত্র প্রতিসংহার করি-

বার মানসে ক্লৃতাঞ্জলিপুটে তাঁহাদিগকে কহিলেন, আমি অশ্বখামার অস্ত্রবেগ নিবারণ করিবার মানসেই দিব্যাস্ত্র প্রয়োগ করিয়াছি। এক্ষণে উহার প্রতিসংহার করিলে নিশ্চয়ই পাপাত্মা অশ্বখামা স্বীয় অস্ত্র প্রভাবে আমাদিগের সকলকে ভস্মাবশেষ করিবে। অতএব যাগাতে আমাদিগের ও লোকের মঙ্গল হয়, আপনারা তাহার মন্তুণা করুন। মহাত্মা ধনঞ্জয় এই বলিয়া স্বীয় অস্ত্র প্রতিসংহৃত করিলেন। ঐ অস্ত্র প্রতিসংহার করা দেবগণেরও অসাধ্য। অন্যের কথা দূরে থাকুক, দেবরাজ ইন্দ্রও উহার প্রতিসংহারে সমর্থ নহেন। ঐ দিব্যাস্ত্র ব্রহ্মতেজ দ্বারা বিনির্মিত। ব্রহ্মচারী ভিন্ন অন্য ব্যক্তি উহা প্রয়োগ করিলে আর প্রতিসংহার করিতে সমর্থ হয় না। ব্রহ্মচার্য্য বিদীন অশিক্ষিত ব্যক্তি ঐ অস্ত্রের প্রতিসংহারের চেষ্টা করিলে উহা তৎক্ষণাৎ তাহারই মস্তক ছেদন করে। মহাবীর ধনঞ্জয় সত্যব্রতপরায়ণ, ব্রহ্মচারী ও গুরুশুশ্রূষাপরতন্ত্র ছিলেন বলিয়াই সেই অস্ত্রের প্রতিসংহারে সমর্থ হইলেন। তিনি ইতিপূর্বে ঘোরতর বিপদ-গ্রস্ত হইয়াও কখন ঐ অস্ত্র প্রয়োগ করেন নাই।

হে মহারাজ! ঐ সময় দ্রোণতনয় মহাবীর অশ্বখামা সেই ঋষিদ্বয়কে পুরো-বর্তী অবলোকন করিয়া কোন ক্রমেই স্বীয় ঘোরতর অস্ত্রের প্রতিসংহারে সমর্থ হইলেন না। তখন তিনি অতিদীন মনে দ্বৈপায়নকে কহিলেন, মুনিমহত্ম! আমি ভীমসেনের ভয়ে ভীত ও নিতান্ত বিপন্ন হইয়াই প্রাণ রক্ষার্থে এই অস্ত্র প্রয়োগ করিয়াছি। ভীম-সেন সমরাক্ষনে দুর্ব্যোধনের বিনাশার্থ কপট ব্যবহার দ্বারা অতি অধর্ম্ম কার্যের অনুষ্ঠান করিয়াছে। আমি সেই কারণে পৃথিবী পাণ্ডবশূন্য করিব বলিয়া এই ছত্রা-

সদ দিব্যাস্ত্র ত্র্যম্বকে নিহিত করিয়া ইহা প্রয়োগ করিয়াছি ; কিন্তু এক্ষণে ইহার প্রতिसংহারে সমর্থ হইতেছি না । হে ত্র্যম্বক ! আমি রাগোন্মত্ত হইয়া পাণ্ডবদিগের বিনাশার্থ অস্ত্র পরিত্যাগ করিয়া অতি কুরুক্ষ্ম করিয়াছি, সন্দেহ নাই । এক্ষণে এই অস্ত্র নিশ্চয়ই পাণ্ডবগণকে বিনাশ করিবে ।

তখন বেদব্যাস কহিলেন, বৎস ! মহা-
আ অর্জুন ত্র্যম্বকের অস্ত্র বিদিত থাকিয়াও
কদাচ তোমার বিনাশের নিমিত্ত রোষ-
ভরে উহা পরিত্যাগ করেন নাই । এক্ষণে
কেবল তোমার অস্ত্র নিবারণের নিমিত্তই
ঐ অস্ত্র প্রয়োগ করিয়াছিলেন ; অচিরে
উহার প্রতিসংহারও করিয়াছেন । ঐ মহা-
তোমার পিতার নিকটে ত্র্যম্বক প্রাপ্ত
হইয়াও কদাচ ক্ষত্রিয়ধর্ম্য হইতে বিচ-
লিত হন নাই । মহাবীর অর্জুন ধৈর্য-
শালী, সাধু ও সর্কাস্ত্রবিশারদ ; তুমি কি
নিমিত্ত তাঁহারে তাঁহার ভ্রাতা ও বন্ধুগণের
সহিত বিনাশ করিতে বাসনা করিয়াছ ।
যে রাজ্যে দিব্যাস্ত্র দ্বারা ত্র্যম্বক নিরাকৃত
হয়, সে রাজ্যে দ্বাদশ বৎসর অনারুচি হইয়া
থাকে । এই জন্য মহাবীর অর্জুন ক্ষমতা-
পন্ন হইয়াও প্রজাগণের হিতার্থ তোমার
অস্ত্র বিনষ্ট করিলেন না । হে দ্রোণতনয় !
এক্ষণে আপনাকে পাণ্ডবগণকে ও তাঁহাদের
রাজ্য রক্ষা করা তোমার অবশ্য কর্তব্য ।
অতএব তুমি অবিলম্বে দিব্যাস্ত্র প্রতিসং-
হার পূর্বক ক্রোধশূন্য হও । পাণ্ডবগণও
নিরাপদ হউক । রাজর্ষি যুধিষ্ঠির কখনই
অধর্ম্মানুসারে বিজয় বাসনা করেন না ।
এক্ষণে তুমি পাণ্ডবগণকে স্বীয় মস্তকাস্থিত
মণি প্রদান কর । উহার সেই মণি গ্রহণ
করিয়া তোমার প্রাণ দান করিবেন ।

তখন অশ্বখামা কহিলেন, মহর্ষে !
পাণ্ডব ও কৌরবগণের যে সকল ধনরত্ন
আছে, তৎসমুদায় ক্রপেক্ষা আমার এই মণি

শ্রেষ্ঠ । ইহা ধারণ করিলে অস্ত্রভয়, ব্যাধিভয়
ও ক্ষুধা এককালে তিরোহিত হইয়া যায়
এবং দেব, দানব, পক্ষগ, রাক্ষস ও তক্ষর
হইতে শঙ্কার লেশমাত্র থাকে না । অতএব
এই মণি কোন ক্রপেই পরিত্যাগ করিবার
উপযুক্ত নয়, কিন্তু আপনি বাহা কহিতে-
ছেন, তাহাও আমার সর্বতোভাবে কর্তব্য ।
এক্ষণে এই মণি বিদ্যমান আছে, আমিও
উপস্থিত রহিয়াছি । আপনার বাহা ইচ্ছা
হয় করুন ; কিন্তু এই অমোঘ ঐষীকাস্ত্র
পাণ্ডবতনয়দিগের মহিলাগণের গর্ভস্থ স-
ন্তান সম্ভূতির উপর নিপতিত হইবে । আমি
কোন ক্রমেই এই অস্ত্র প্রতিসংহার করিতে
সমর্থ হইতেছি না ।

তখন বেদব্যাস কহিলেন, হে দ্রোণপুত্র !
এক্ষণে পাণ্ডবতনয়দিগের কামিনীগণের
গর্ভে অস্ত্র নিক্ষেপ করাই তোমার কর্তব্য ।
আর অন্য ইচ্ছা করিও না । মহাআ বেদ-
ব্যাস এই কথা কহিলে দ্রোণতনয় পাণ্ডব-
তনয়দিগের মহিলাগণের গর্ভ উদ্দেশ্য ক-
রিয়া সেই দিব্যাস্ত্র পরিত্যাগ করিলেন ।

ষোড়শ অধ্যায় ।

অনন্তর মহামতি বাসুদেব পাশ্চাত্য
অশ্বখামা পাণ্ডবকামিনীগণের গর্ভে ঐষী-
কাস্ত্র পরিত্যাগ করিয়াছেন অবগত হইয়া
হৃষ্টাশ্রুতকরণে তাঁহারে কহিলেন, দ্রোণতনয় !
পূর্বে এক ত্রতপরায়ণ ত্র্যম্বক বিরাট নগরে
বিরাটভূমিতে অর্জুনের পুত্রবধূ উত্তরারে
কহিয়াছিলেন যে, রাজকুমারি ! কৌরব
বংশ উৎসন্ন প্রায় হইলে তোমার গর্ভে
এক পুত্র জন্ম গ্রহণ করিবে । কৌরব বংশের
পারিক্ষীণবস্ত্রায় ঐ পুত্রের জন্ম হইবে
বলিয়া উহার নাম পারিক্ষিৎ হইবে । হে
আচার্য্যতনয় ! সেই সাধু ত্র্যম্বক বাহা
কহিয়া গিয়াছেন, তাহা কদাচ মিথ্যা হইবার
নহে । অতএব নিশ্চয়ই পাণ্ডবগণের পরি-

ক্ষিৎ নামে এক বংশধর পুত্র উৎপন্ন হইবে।

তখন মহাবীর অশ্বখামা ক্রোধের মুখে সেই কথা শ্রবণ করিয়া ক্রোধাবিস্ট চিত্তে কহিলেন, কেশব! তুমি পাণ্ডবগণের প্রতি পক্ষপাত প্রদর্শন পূর্বক যাহা কহিলে, তাহা কদাচ সফল হইবে না। আমি যাহা কহিয়াছি, তাহাই ঘটবে। দেখ, তুমি বিরাট-দুহিতার গভঃ রক্ষা করিবার বাসনা করিতেছ; কিন্তু আমার এই অস্ত্র অচিরে তাহাতে নিপতিত হইবে। বাসুদেব কহিলেন, দ্রোণতনয়! তোমার দিব্যাস্ত্র কদাচ ব্যর্থ হইবে না। কিন্তু সেই গভঃ বালক-মৃত ও পুনরায় জীবিত হইয়া সুদীর্ঘকাল রক্ষুক্ষরা অধিকার করিবে। হে দ্রোণাজ্ঞ! মনোবিগণ তোমারে পাপপরায়ণ কাপুরুষ বলিয়া অবগত আছেন। তুমি বালক ঘাতী, অতএব তোমারে এক্ষণে অবশ্যই এই পাপ কর্মের ফল ভোগ করিতে হইবে। তুমি অসহায় হইয়া মৌন ভাবে তিন সহস্র বৎসর নির্জন প্রদেশে পর্যটন করিবে; কদাচ লোকালয়ে অবস্থান করিতে পারিবে না। তোমারে সর্বপ্রকার ব্যাধিগ্রস্ত ও পুয়শোণিতগন্ধ সম্পন্ন হইয়া নিরন্তর দুঃখ অরণ্যে পরিভ্রমণ করিতে হইবে। আর পাণ্ডবকুলতিলক পরিক্ষিৎ ক্রমশঃ পরিবর্জিত হইয়া বেদাধ্যয়ন ও কৃপাচার্য্য হইতে অস্ত্রশস্ত্র সমুদায় শিক্ষা করিয়া ক্ষত্রিয়ধর্ম্মানুসারে ষষ্টি বৎসর পৃথিবী পালন করিবে। হে নিকোথ! তোমার সমক্ষেই পরিক্ষিৎ কুরুকুলে রাজপদবী প্রাপ্ত হইবে। এক্ষণে তুমি তাহারে অস্ত্রানলে দগ্ধ করিলেও আমি পুনরায় তাহার জীবন প্রদান করিব। আজ তুমি আমার তপস্যা ও সত্যের পরাক্রম অবলোকন কর।

তখন বাসুদেব কহিলেন, হে দ্রোণাজ্ঞ! তুমি যখন আমাদিগকে অনাদর

করিয়া এই নিদারুণ কার্য্যের অনুষ্ঠান করিলে এবং যখন তুমি ব্রাহ্মণ হইয়াও ক্ষত্রিয়ধর্ম্ম অবলম্বন পূর্বক কুকর্মে প্রবৃত্ত হইলে, তখন বাসুদেব যাহা কহিলেন, তাহা তোমারে অবশ্যই ভোগ করিতে হইবে। তখন মহাবীর অশ্বখামা বাসুদেবের বাক্য শ্রবণ করিয়া কহিলেন, হে তপোধন! আমি এই জীঘ্রীলোকে আপনারই সহিত বাস করিব, তাহা হইলেই আপনার ও বাসুদেবের বাক্য সত্য হইবে। অশ্বখামা এই বলিয়া পাণ্ডবগণকে সেই মণি প্রদান পূর্বক বিষন্ন মনে সর্বসমক্ষে বনে প্রস্থান করিলেন। পাণ্ডবেরাও সেই মণি গ্রহণ পূর্বক বাসুদেব, ব্যাস ও নারদকে সম্মান করিয়া সত্বরে ক্রোধের সহিত বায়ুবেগগামী অশ্বসংযোজিত রথে আরোহণ পূর্বক প্রায়োপবিষ্টা ক্রুষ্ণার নিকটে বাবনান হইলেন।

তাঁহারা কিয়ৎক্ষণ মধ্যে শিবিরে গমন পূর্বক সত্বরে রথ হইতে অবতীর্ণ হইয়া দেখিলেন, দ্রৌপদী শোকাকুলিত চিত্তে নিরানন্দে অবস্থান করিতেছেন। তখন পাণ্ডবগণ বাসুদেবের সহিত নিতান্ত দুঃখিত মনে দ্রৌপদী সন্নিধানে উপস্থিত হইয়া তাঁহারে পরিবেষ্টন পূর্বক উপবিষ্ট হইলেন। অনন্তর মহাবীর বৃকোদর রাজা যুধিষ্ঠিরের আদেশানুসারে দ্রৌপদীকে অশ্বখামার শিরোমণি প্রদান পূর্বক কহিলেন; প্রিয়ে! তুমি বাহা প্রার্থনা করিয়াছিলে, তোমার পুত্রহন্তারে পরাজয় করিয়া এই তাহা আনয়ন করিয়াছি; এক্ষণে তুমি উশ্বিত হইয়া ইহা গ্রহণ এবং ক্ষত্রিয়ধর্ম্ম স্মরণ পূর্বক শোক পরিত্যাগ কর। ধর্ম্মরাজ সন্ধিস্থাপনের বাসনা করিলে বাসুদেব যখন তুষ্যোধন সন্নিধানে গমন করেন, তৎকালে তুমি তাঁহারে কহিয়াছিলে, মধুসূদন! ধর্ম্মরাজ শাস্তি স্থাপনের ইচ্ছা করিতেছেন, অতএব বোধ হয়,

আমার পতি, পুত্র ও ভ্রাতৃগণ কেহই নাই এবং তুমিও বিনষ্ট হইয়াছ। হে দ্রোপদী ! তুমি তৎকালে যে সকল ক্ষত্রিয়ধর্ম্মানুরূপ অতি কঠোর বাক্য প্রয়োগ করিয়াছিলে ; এক্ষণে তৎসমুদায় স্মরণ কর। আমি আমাদিগের রাজ্যলাভের কষ্টক স্বরূপ দুঃখ দুর্ঘ্যোধনের বিনাশ সাধন এবং জীবিতাবস্থায় দুঃশাসনের শোণিত পান করিয়াছি। এক্ষণে আমাদিগের বৈরানল এককালে নির্ব্বাণ হইয়া গিয়াছে। এক্ষণে আমাদিগকে আর কেহ কোন অংশেই নিন্দা করিতে সমর্থ হইবে না। আমি অশ্বখামারে পরাজয় পূর্ব্বক ব্রাহ্মণ ও গুরু বলিয়া পরিচয় করিয়াছি। তাহার সমগ্র যশ অপহৃত হইয়াছে ; এক্ষণে কেবল কলেবরমাত্র অবশিষ্ট আছে এবং সে মণিবিষোজিত ও আয়ুর্ভ্রষ্ট হইয়া দীনহীনের ন্যায় বিচরণ করিতেছে।

হে মহারাজ ! মনস্বিনী দ্রোপদী বৃক্শদরের মুখে এই সমস্ত বাক্য শ্রবণ করিয়া কহিলেন, নাথ ! আমার মনোরথ সকল হইল। দেখ, গুরুপুত্রও আমার গুরু ; অতএব তিনি যে মণি ধারণ করিতেন, এক্ষণে ধর্ম্মরাজ উহা স্বীয় মস্তকে ধারণ করুন। অনন্তর ধর্ম্মরাজ দ্রোপদীর অনুরোধে সেই মণি গ্রহণ পূর্ব্বক গুরুর উচ্ছ্রিত জ্ঞান করিয়া মস্তকে ধারণ করিলেন। মণি ধর্ম্মরাজের মস্তকে সন্নিহিত হইলে চন্দ্রমণ্ডল মণ্ডিত পর্ব্বতের ন্যায় তাহার অপূর্ব্ব শোভা হইল। তদ্বর্ণনে পুত্রশোকাতুরা দ্রোপদী অবিলম্বে গাত্রোপ্তান করিলেন।

সপ্তদশ অধ্যায় ।

হে মহারাজ ! অনন্তর রাজা যুধিষ্ঠির দ্রোণপুত্র প্রভৃতি বীরজয়ের হস্তে স্বীয় সমস্ত সৈন্য ও পুত্রগণের নিধন নিবন্ধন নিতান্ত শোকসমুত্ত হইয়া বাসুদেবকে কহি-

লেন, মধুসূদন ! পাপাত্মা নরাধম অশ্বখামা কি কপে আমার মহারথ পুত্রগণকে নিপাতিত করিল এবং রুতায় মহাবল পরাক্রান্ত দ্রুপদতনয়গণ লক্ষ বীরের সহিত যুদ্ধ করিতে পারিত, তাহারা কি নিমিত্ত দ্রোণপুত্র কর্তৃক নিহত হইল। মহারথ বৃষ্টিভ্রম সংগ্রামে প্রবৃত্ত হইলে দ্রোণাচার্য্য ও তাঁহার সম্মুখীন হইতে পারেন নাই ; এক্ষণে সেই বীর কি কারণে অশ্বখামার হস্তে প্রাণ ত্যাগ করিল। কলত অশ্বখামা এমন কি উপায় অবলম্বন করিয়া একাকী আমার পক্ষীয় সমুদায় বীরের প্রাণ সংহার করিলেন, তাহা কীভূত কর।

বাসুদেব কহিলেন, মহারাজ ! দ্রোণকুমার নিশ্চয়ই দেবদেব মহাদেবের শরণাপন্ন হইয়াছিল এবং তাঁহারই প্রসাদে একাকী সমুদায় বীরকে নিপাতিত করিয়াছে। ভগবান্ রুদ্র প্রসন্ন হইলে বলবীর্ঘ্যের কথা দূরে থাকুক, অমরত্ব পর্য্যন্ত প্রদান করিতে পারেন। তাঁহার প্রভাবে লোকে ইন্দ্রকেও নিপীড়িত করিতে সমর্থ হয়। আমি দেবদেব মহাদেবকে ও তাঁহার পুণ্যতন কার্য্য সমুদায় বিশেষরূপে বিনিত আছি। তিনিই সর্গভূতের আদি, মধ্য ও অন্তস্বরূপ। তাঁহার প্রভাবে এই জগতের সমুদায় কার্য্য সুসম্পন্ন হইতেছে। পক্ষি লোকপিতামহ ব্রহ্মা লোক উৎপন্ন করিবার মানসে ভগবান্ রুদ্রকে কহিলেন, তুমি অচিরে ভূতগণের সৃষ্টি কর। ভগবান্ দেবদেব তাঁহার বাক্য শ্রবণে তথাস্তু বলিয়া স্বীকার করিলেন এবং সর্বাগ্রে প্রজার সৃষ্টি করা নিতান্ত অকর্তব্য বিবেচনা করিয়া মলিলে প্রবেশ পূর্ব্বক দীর্ঘ কাল তপস্যা করিতে লাগিলেন। বিধাতা তাঁহার নিমিত্ত বহু কাল প্রতীক্ষা করিয়া পরিশেষে ভূতসৃষ্টির নিমিত্ত আর এক জন অমরের সৃষ্টি করিলেন। তিনি ভগবান্ রুদ্রকে জলময়

দেখিয়া পিতারে কহিলেন, ভগবন্! যদি অন্য কেহ আমার অগ্রজ না থাকেন, তাহা হইলে আমি প্রজাগণের সৃষ্টি করিতে পারি। তখন কমলযোনি কহিলেন, বৎস! এক্ষণে তোমার অগ্রজ কেহই নাই। মহাদেব জন্মমগ্ন হইরাছেন। অতএব তুমি নিঃশঙ্ক চিত্তে আত্মকার্য্যানুষ্ঠান কর। তখন অমর ব্রহ্মার বাক্যানুসারে সমুদায় ভূত ও দক্ষাদি সপ্ত প্রজাপতির সৃষ্টি করিলেন। ঐ সমুদায় প্রজাপতি হইতেই এই চতুর্বিধ প্রাণীর সৃষ্টি হইয়াছে। অনন্তর প্রজাগণ নিতান্ত ক্ষুধাতুর হইয়া সৃষ্টিকর্ত্তার তক্ষণ করিবার মানসে তাঁহার নিকটে সহসা ধাবমান হইল। তখন তিনি ভীত চিত্তে লোকপিতামহ ব্রহ্মার নিকটে সমুপস্থিত হইয়া কহিলেন, ভগবন্! প্রজাগণের আহার নির্দেশ পূর্ব্বক আমারে পরিত্রাণ করুন। ব্রহ্মা তাঁহার বাক্য শ্রবণে প্রজাগণের আহারার্থ ঔষধি প্রভূত স্বাবর পদার্থ সমুদায় নির্দিষ্ট করিয়া দিলেন। তাঁহারই নিয়মানুসারে দুর্কল প্রাণগণ বলবান্দিগের আহারার্থ নির্দিষ্ট হইয়াছে। তখন প্রজাগণ আপনাদিগের ভক্ষ্য দ্রব্য প্রাপ্ত হইয়া স্বচ্ছানুসারে প্রস্থান করিল এবং সকলেই স্ব স্ব জাততে অনুরক্ত হইয়া জীবনংখ্যা পরিবর্দ্ধিত করিতে লাগিল।

হে মহারাজ! প্রজাগণ এই রূপে পরিবর্দ্ধিত ও লোকগুরু ব্রহ্মা পরতুষ্ট হইলে ভগবান্ মহাদেব নালল হইতে সমুপস্থিত হইলেন এবং ঐ সমস্ত ভেজঃপরিবর্দ্ধিত অসংখ্য প্রজা দর্শনে রোষাবিষ্ট হইয়া স্বীয় লিঙ্গ ভূতলে প্রবেশিত করিলেন। তখন ভগবান্ ব্রহ্মা বিবিধ বাক্যে তাঁহারে সান্ত না করত কহিলেন, মহাদেব! তুমি এত দীর্ঘ কাল সাললমধ্যে অবস্থান করিয়া কি কার্য্য করিলে; আর কি নিমিত্তই বা এক্ষণে আপনার লিঙ্গ ভূতলে প্রবেশিত

করিয়াছ? তখন মহাদেব কোপাবিষ্ট হইয়া তাঁহারে কহিলেন, বিধাত! আমার অগোচরে আর এক জন এই সমস্ত প্রজার সৃষ্টি করিয়াছে। অতএব আমার এই লিঙ্গে আর প্রয়োজন কি? আমি জন্মমগ্নে তপস্যা করিয়া প্রজাগণের নিমিত্ত অন্ন সৃষ্টি করিয়াছি। প্রজাদিগের ন্যায় ঔষধি সমুদায়ও পরিবর্দ্ধিত হইবে। ভগবান্ রুদ্ধ এই বলিয়া ক্রোধভরে তপঃসাধনার্থ মুঞ্চবান্ পর্ব্বতে প্রস্থান করিলেন।

অষ্টাদশ অধ্যায়।

অনন্তর দেবযুগ অতীত হইলে দেবগণ বেদবিধানানুসারে যজ্ঞ করিবার মানসে হবিঃ প্রভৃতি উপকরণ সামগ্রী সমুদায় আহরণ করিলেন। তাঁহারা যজ্ঞভাগ কল্পনা সময়ে ভগবান্ ভূতভাবনকে বিশেষরূপ বিদিত ছিলেন না বলিয়া তাঁহার ভাগ নির্দেশ করেন নাই, কেবল আপনাদিগেরই ভাগ কল্পিত করিয়াছিলেন। তখন কুন্তিবাসা ভূতপাত স্বীয় ভাগ কল্পনা না হওয়াতে প্রথমেই যজ্ঞনাশক শরাসনের সৃষ্টি করিতে আভিলাষ করিলেন। হে মহারাজ! লোক-যজ্ঞ, ক্রিয়াযজ্ঞ, গৃহযজ্ঞ ও পঞ্চভূতযজ্ঞ এই চারি যজ্ঞ দ্বারা সমুদায় জগৎ সৃষ্ট হইয়াছে। মহাত্মা মহেশ্বর ঐ সমুদায় যজ্ঞের মধ্যে লোকযজ্ঞ ও নৃযজ্ঞ দ্বারা পঁচাকঙ্কু পরিমাণ এক শরাসন নির্মাণ করিলেন। বষট্কার ঐ শরাসনের জল হইল এবং চারি যজ্ঞাঙ্গ উহার দৃঢ়তা সম্পাদন করিল। তখন ভগবান্ মহাদেব ক্রোধভরে সেই কার্ম্মক গ্রহণ করিয়া ব্রহ্মচারিণ্যে দেবগণের যজ্ঞস্থলে আগমন করিলেন। তাঁহারে ধনুঃস্পাণি অবলোকন করিয়া বসুন্ধরা নিতান্ত ব্যথিত হইলেন। পক্ষত সকল কল্পিত হইতে লাগিল; সমীরণ স্থির হইলেন; হতাশনও আর পূর্ব্ববৎ প্রজ্বলিত হইলেন।

না ; অন্তরীক্ষমধ্যে নক্ষত্রমণ্ডল ভীত হইয়া পরিভ্রমণ করিতে লাগিল ; দিবাকরের আর সেকপ জ্যোতি রহিল না ; চন্দ্রমণ্ডল একবারে শোভা বিহীন হইল এবং ভূমণ্ডল ও নভোমণ্ডল নিবিড় অন্ধকারে আচ্ছন্ন হইয়া পড়িল । তখন দেবগণ নিতান্ত ভয়া-ভিত্ত হইয়া বিষয়জ্ঞানশূন্য হইলেন এবং তাঁহাদের যজ্ঞেরও শোভা তিরোহিত হইয়া গেল । অনন্তর মহাদেব আতী ভীষণ শর দ্বারা সেই যজ্ঞকে বিদ্ধ করিলেন । যজ্ঞ বাণ-বিদ্ধ হইয় মৃগরূপ ধারণ পূর্বক পাবকের সহিত তথা হইতে নিষ্কান্ত হইয়া স্বর্গে গমন করিতে লাগিল । মহেশ্বরও তাহার পশ্চাৎ পশ্চাৎ ধাবমান হইলেন ।

এই রূপে যজ্ঞ তথা হইতে প্রশ্রান করিলে দেবতাদিগের আর কিছুমাত্র জ্ঞান রহিল না । তখন ভগবান্ বিক্রপাক্ষ চাপকোট দ্বারা সূর্যের ভুজযুগল, ভগ্নের নয়নদ্বয় এবং পৃথার দন্তপংক্তি বিনষ্ট করিলেন । তখন দেবগণ ও যজ্ঞাঙ্গ সমুদায় ভীত চিত্তে তথা হইতে পলায়ন করিতে লাগিলেন এবং কেহ কেহ ঘূর্ণায়মান হইয়া তথায় মৃতবৎ নিপতিত রহিলেন । মহাত্মা মহাদেব এই রূপে সকলকে বিদ্রাবিত করিয়া হাস্য বদনে শরাসন দ্বারা দেবগণের গতি রোধ করিলেন । ঐ সময় দেবগণের বাক্যে সহসা সেই শরাস-

নের জ্যা ছিন্ন হইয়া গেল । তখন দেবগণ দেবশ্রেষ্ঠ মহাদেবকে শরাসনবিহীন দেখিয়া যজ্ঞের সঙ্গিত তাঁহার সমীপে সমুপস্থিত হইয়া শরণাগত হইলেন । তদ্রূপে ভগবান্ ভূতপতি প্রসন্ন হইয়া জলাশয়ে স্বীয় ক্রোধ সংস্থাপন করিলেন । সেই ক্রোধ অধিকপ ধারণ করিয়া সলিল শোষণ করিতে লাগিল । অনন্তর মহাদেব সূর্য্যকে ভুজযুগলদ্বয় ও পৃথারে তাঁহার দন্তপংক্তি প্রদান করিয়া যজ্ঞ করিতে আদেশ করিলেন । তখন সমুদায় জগৎ সুস্থ হইল । দেবগণ সমস্ত হব-ণীয় দ্রব্যে মহেশ্বরের ভাগ কল্পনা করিলেন ।

হে ধর্ম্মনন্দন ! এই রূপে দেবাদিদেব মহাদেব ক্রুদ্ধ হওয়াতে সকলেই অসুস্থ হইয়াছিল এবং তিনি প্রসন্ন হওয়াতে সমুদায় সুস্থ হইল । এক্ষণে সেই মহাবীর্ষ্যশালী ভগবান্ ভূতনাথ অশ্বখামার প্রতি প্রসন্ন হওয়াতেই সে আপনার মহারথ পুত্রগণ এবং অনুচর সনবেত মহাবলশালী পাঞ্চাল-গণকে নিহত করিয়াছে । অশ্বখামার প্রভাবে কখনই একপ ঘটে নাই, কেবল মহাদেবপ্রসাদেই এই রূপ ঘটনা উপস্থিত হইয়াছে । অতএব এক্ষণে কার্গ্যাতুর সাধনের চেষ্টা করুন ।

ঐষীক পর্ব্ব সমাপ্ত ।